

EL SANTO EVANGELIO SEGUN SAN MARCOS

Juan el Bautista Dios cheë senei senei

1 ¹ Ñ tasenei na jêje. Dios cheë turã Jesucristo riî. Jesucristo rei Dios riirî. ² Sã Isafãs Dios cheë mbesa cose no: Secheë nderaosa amondo quia nderëta aque. Ae ra ñeenda mbuquiche nembraerã, i que Dios ra. ³ Emo ndiqui ñeemombo mombo turúquiaa hue. “Sã emo ndiqui ñeenda mbuquiche no, eï jenye si chõ nguia jê abe ico quiatu nandererecua raarõ arõ”, i equia turúquiaa hue, i que Isafãs embesa ra. ⁴ Juan el Bautista que tu ùquï ñee nguire cote ra. Dios cheë ngue esenei senei nguia turúquiaa cote ra. —Jendua si Dios rese. Jêhui chõ jêicuã si. Dios jêicuã mbutiã sacua. Ûquï mose nda bautizar ae jêje chã, i beite que Juan nguia ñee nda. ⁵ Jerusalén jenda que ngaë ngaë tuchi quia echeë andu ra. Judea jenda abe no. Mbia huïcuã nenei nenei mose Dios je, ùquï mose que Juan ndiqui bautizar i ee ra. Ama Jordán ye. ⁶ Quiicuã mbuaera chõ ngue Juan irao ra. Camello. Mbae ire chõ ngue enumbicuaa no nda. Tucu mbuae chõ ngue eu eu quia ra. Irao quiaa riinda abe. ⁷⁻⁸ Dios cheë ngue esenei senei nguia ra: —I achõ je chõ aico nguia bautizar i mbia je co. Co chi emo ndu quia serui co. Dios riirî tuchi chõ ae re. Ae quia equirãcuã tuchi sesi re. Ae quia eturã tuchi sesi no nde. Ae quia tura bautizar i mbia je Espiritu Turã je. Mbia chiã mbitirõ sacua, i beite que Juan nguia ra.

Juan bautizar i Jesús je

⁹ Aque mose que Jesús ru sucha tubiriã Nazaret si ra. Galilea jenda rei Nazaret. Juan ngue bautizar i Jesús je ra. Ama Jordán ye. ¹⁰ Jesús que usë oso ama si cote ra. Ibei que nyeequia ee cote ra. Espiritu Turã ngue nguichi u erese cote ra. Nyurushi rá ngue eru nguichi erese ra. ¹¹ Ibei jenda que ñee ee ra. —Seriirî ño nde re. Sechesequa chõ nde re. Seyate nderese, i que Dios ñee ee ra.

Jesús tambii cuã, i raque Satanás

¹²Espíritu Turã ngue Jesús querao turúquiaa cote ra. ¹³Huee que Jesús riqui arete ra. Cuarenta días. Nyacua risha ite re. Mbia riichare ja ite re. Satanás que tu rei tã i ee cote ra. Angeles que ngaẽ ngaẽ nguia ereaquiatu ra.

Jesús mbia mbaaquiату quiatu ramo

¹⁴Mbia rerecua que Juan tarõ cárcel cote ra. Aquere que Jesús si Galiléaa ra. Dios cheẽ turã ngue esenei senei nguia huee ra. ¹⁵—Achite Dios ñi tu mbia rerecuarã a. Jendua sí Dios rese. Jẽhui chõ jẽicua si. Dios cheẽ turã jẽicua. Ñ nda Dios jemingo bei, i que Jesús quia ñee mbia je ra.

Jẽingo serui, i Jesús uchimbaaquiaturã je

¹⁶Jesús que ngata oso quia ama nimia ndui ra. Galilea, i que aque ama ndisha je ra. Huee que mae Simón ndese ra. Enongue abe rese mae. Andrés, i equia ee. I que u sira mbua mbuasa mondo mondo ii ra. Sira resenda bei rei ùquĩ. ¹⁷Jesús que ñee ee ra. —Serui bei chõ jẽingo jẽ. Taembaaquiату quiatu. Mbia teendu endu bei quia seje cote, i que ee ra. ¹⁸Nyoi ja que erui ra. Sira mbuasa si que echoi hui ra. ¹⁹Pe jiri que mae Jacobo rese ra. Enongue rese abe. Juan, i equia ee. Zebedeo riiri ja rei ùquĩ. Huee que echì ja canoa ye sira mbuasa mbitirõ tirõ nda. ²⁰—Jẽingo serui, i que Jesús ñee ee ra. Echeẽ nduibe tuchi que echoi erui ra. Ngu que esecha choi ra. Eru que siquichõ canoa ye nguimba rese ra.

Jesús aba checuayã icuã jea mbia mo si

²¹Nyoi que sucha tubiriã Capernaum nda. Sábado mose que Jesús si judfós chumunua nuásaa ra. Mbia mbaaquiату quiatu sacua. ²²Mbia rerecua rã ño ngue eriqui mbia mbaaquiату quiatu ra. Embesasa rã eã. Nyebe mbia riqui nguia nyuruira tuchi echeẽ andu. ²³Huee que amei mo ndiqui mbia chumunuásaa ra. Aba checuayã icuã nyireco rei ae. Ñee asite que Jesús je ra. ²⁴—¿Mbaerã erechu urerea co re, Jesús? Quiatúae urerecha ae. ¿Urericharã ño erechu quia co re? Dios rucucha chõ nde re. Areicuate se, i rei que aba checuayã ñee asite ee ra. ²⁵Jesús que ñee asi ee cote ra. —¡Equiriri chõ jẽ! Esẽ oso amei ñiangui si, i que ee ra. ²⁶Jesús cheẽ mose que aba checuayã amei mburirite cote ra. Tasẽ ngue oso usẽ amei si cote ra. ²⁷Mbia que nyuruira tuchi mae Jesús rese ra. Ñee ñee ja que nyue cote ra. —Jesús riquichĩ mbia mbaaquiату quiatu ucheẽ namonda je co. Equiracuã ae ñee nguia. Mbia rerecua rã ño eriqui nguia ñee aba checuayã icuã je co. Sã aba checuayã echeẽ mumbayãte jẽ, i que mbia ra. ²⁸Mbia que jirandu jei Jesús rese Galilea jenda ja cote ra.

Jesús Simón ninisi si mbucherõ

²⁹Jesús que usẽ nyoi mbia chumunuasa si cote ra. Nyoi que Simón nyuchua ra. Andrés abe que siqui rei huee tuchia ra. Jesús que ique

nyoi huee ra. Jacobo rese. Juan ndese abe no. ³⁰I que Pedro chari rasi u nyaara ee ra. Eracu tuchi que ra. ³¹Jesús que eo isi embuchuruã nda. Aque mosebe que eracu ti i esi cote ra. Mbae que echao chao quia mbia chiurã cote ra.

Jesús mbia rasi chumumbara mbucherõ

³²Itondaru ramo mose que mbia erasi rurucuaẽ cuaẽ tuchi Jesús je ra. Ae aba checuayã quereco quia nae, ùquĩ abe que ecurucuaẽ cuaẽ tuchi quia ee ra. ³³Sucha tubiriã jenda ja que chi ñumunua eiquésaa ra. ³⁴Mbia rasi chumumbara que embucherõ cherõ ja ra. Aba checuayã icuã tubiriã ngue ejea jea quia mbia si ra. Aba checuayã ngue Jesús icuate rei ra. Nyebe Jesús riqui nguiã echeẽ ndiquisã quisãte.

Jesús mbia Galilea jenda mbuchesea sea

³⁵I nyaashĩ oso quia, aque mose que Jesús juã oso mbia tiãsa ra. Ñee sacua Dios je itondaru bei mose. ³⁶Simón ngue oso erui emuña nda. Nguesenda rese. ³⁷Ngasẽ ngue ee ra. —Pe mbia chi nderequia jate pe, i que ee ra. ³⁸Jesús que ñee ee ra. —Nyao sucha tubiriã mbuchesea sea achĩ jenda. Dios cheẽ nda asenei senei ee chã. Nyebe achu nguiã, i que ee ra. ³⁹Galilea jenda que embuchesea sea ja cote ra. Dios cheẽ nenei nenei judíos chumunua nuásaa. Aba checuayã abe jea jea mbia si.

Jesús mbia leproso mbucherõ

⁴⁰Emo ndasi que ngasẽ Jesús je ra. Leproso, i que ùquĩ erasi je ra. Tu que ngoi ngũĩã ndese ñee Jesús je ra. —Nde sembucherõse mose, sembucherõ se, i tuchi que ñee ee ra. ⁴¹Jesús ia eã tuchi que erese ra. Ñomee ngue oco erese cote ra. —Eno. Tarembucherõ, i que ee ra. ⁴²Echeẽ nduibe tuchi que nyerõ cote ra. ⁴³⁻⁴⁴Jesús que ñee ee ra. —Sã jẽ. Erecheẽchĩ nda emo je jẽ. Eso nderasiã ndeacuquia sacerdote je cote. Moisés cheẽ ndui si chõ mbae mo emondo Dios je. Eĩ nda mbia jirandu nderasiã ndese cote, i rei que Jesús ñee emondo ra. ⁴⁵Mbia que embiirandu ja tuchi chõ oso ra. Nyebe Jesús nyecua aroneate nguiã sucha tubiriã mo. Siquiibi ibi chõ ngue eriqui cote ra. Icuenda ja que ngaẽ ngaẽ nguia erea ra.

Jesús emi sayã mo mbucherõ

2 ¹Emo mose jiri que Jesús nyebi Capernaum nda. Echuchua ereco mose que mbia jirandu erese ra. ²Mbia tubiriã ngue ñumunua ee ra. Mbia chayã tuchi que ra. Eĩ quesa abe itãyã tuchi que ra. Dios cheẽ ngue esenei senei tuchi quia ee ra. ³Mbia cuatro que erasi mo curucuaẽ ee ra. Emi sayã. ⁴Mbia tubiriã ngue tuchia mbiitãyãte eriquisã nda. Nyebe erasi ruruchoi nguiã sui tei quite arõ. Tei que endoro cote ra. Erasi que

embuquichi imbu quisa ye Jesús je cote ra. ⁵—Erurucuaësa riqui seicuate ùquĩ, i que Jesús ñee uchiangui re ra. Nyebe ñee nguiã emi sayã je. — Echo, ndechisaã mbae icuã ambutiã nguia ndesi a, i que ee ra. ⁶Embesasa mo abe que chi echeẽ andu ra. Mae icuã icuãte que equia Jesús res e ra. ⁷—¿Mbaerã Jesús riqui ñee ùquĩ nde? Ñee icuã icuã ñochĩ equia Dios riĩ co. Dios ibatenda ae mbi a chiao icuã mbutiã tiã nguia esi resẽ, i rei que ñee icuã icuã Jesús riĩ nda. ⁸Jesús que ùquĩ ndua ndua icuate quia ra. Nyebe ñee nguiã ee cote. —¿Mbaerã jẽingo ndua ndua icuã nde? ⁹¿Ma mbaranguiatuã eã jiri jẽje re? ¿Mbia icuã mbutiã esi ere? Mbia rasi mbucherõ ere no ae. ¿Ma mbaranquiatuã eã jiri jẽje re? ¹⁰Dios rucucha rei se. Mbia chiao icuã mbutiã aquiatu chõ se re. Sequirãcuã tateacuquia jẽje, i que Jesús ñee ee ra. Ñee ngue erasi je cote ra. ¹¹—Ehuã na. Ndechuchua eso cote. Ndequisa abe erao, i que Jesús emi sayã je ra. ¹²Emi sayã ngue juã asi Jesús cheẽ nduibe cote ra. Nguia que esirõ asite serao cote ra. Mbia resa rae ja. —Ã ndese que ureico mae eã tuchi emo mose ra, i tuchi que mbia u mae nyuruira erese ra. Mbia que ñee turã jate Dios quirãcuã ñii cote ra.

Serui bei eico, i Jesús Leví je

¹³Jesús que oso si ama ndisha rimíaa nda. Mbia que ngaẽ ngaẽ jate erea ra. Jesús que embaaquiату quiatu ra. ¹⁴I que Jesús oso quia ra. Mae ngue Leví rese ra. Alfeo riirĩ ngue Leví ra. Ngoi que huĩ plata isi isi impuestorã nda. —Serui bei eico, i que Jesús ñee ee ra. Ae Leví juã oso nguiã erui.

¹⁵Jesús que nyoĩ quiaru erese ra. Impuestos isi isiquia ata que chi quiaru erese huee ra. Echimbaaquiату abe rese. Mbia icuã mo abe que chi quiaru erese no nda. Ùquĩ tubiriãte que siqui erui ra. ¹⁶Fariseos que ñee icuãte Jesús chimbaaquiату je ra. Embesasa abe que ñee icuãte ee ra. —¿Mbaerã Jesús riqui quiaru mbia icuãte rese re? i que ñee nda. ¹⁷Nyebe Jesús ñee nguiã ee. —Sã mbia rasiã ndiqui aba mbucherõsa requia eãte no. Sã erasi chõ ndiqui erequia no. “Jenyu seje” ae eã ngue u nguiã mbia turã je. Mbia icuã je chõ ngue achu nguiã “jenyu seje” i, i que Jesús ra.

Jesús chimbaaquiату hui ãte uchiu si

¹⁸Juan ñimbaaquiату que hui uchiu si aque mose ra. Fariseos chimbaaquiату abe no. Nyebe mbia ngaẽ nguiã ñee Jesús je. —¿Mbaerã ndechimbaaquiату abe riqui hui ãte uchiu si re? i que ñee Jesús je ra. ¹⁹Jesús que ñee ee ra. —Sã emo ndiqui ngüinisirã isi ramo no. Sã eresenda iate riqui quiaru erese no. Sã eriqui hui aroneate uchiu si aque mose no. ²⁰Sã eru riqui mano emo mose no. Aque mose ramo nguiatu ra equiату hui uchiu si cote. ²¹Sã emo ndiqui tiru yasu mii aroneate tiru ima sorei rese no. Eyasu ra nyaacua quiata eima si. Soro icoi tuchi chõ nda

cote. ²²Sã emo mbaeri rasi ramo nderecoquiatu eã eriru ima ye no. Mbae ire ima ye ererecoquiatu aronea ño ñene. Eri rasi ra ñimatã ño mbae ire ndoro. Eri ra uchẽ ja. Mbae ire abe mbiicuãte ra cote. Mbaeri yasu quia nda equerecoquiatu nguiã mbae ire yasu ye. Soroã sacua, i que Jesús ñee ee ra.

Jesús chimbaaquiatu mbae a ishao shao sábado mose

²³Sábado mose que Jesús si quia mbiaco ite ite rĩ emo mose ra. Echimbaaquiatu que quiata a nyiqui nyiqui choi quia erui ra. ²⁴Fariseos mo ngue ñee ee ra. —¿Mbaerã ndechimbaaquiatu riqui mbae ishao shao sábado mose re? Co mose chõ mbia riqui uquenea ucua resẽ, i que fariseos ñee Jesús je ra. ²⁵Jesús que ñee ee ra. —¿Embesa ji rese jemae eã David riĩ nyii re? David riãcuãte que aque mose ra. Eresenda abe riãcuãte que eriqui aque mose no nda. ²⁶David que ique Dios chuchua aque mose ra. Abiatar que sacerdote rere cua aque mose ra. Mbichae Dios chuchua jenda que David u ra. Mee mee ngue nguesenda abe je ra. Eriãcuãte quiatu ngue re. Sacerdote mbaerã ja chõ ndaque mbichae, i que Jesús fariseos je ra. ²⁷—Sábado que Dios chao mbia mbaerã nda. Sábado mbaerã eã ño Dios mbia ao nguiã. ²⁸Sábado rerecua bei chõ se re, i que Jesús ñee fariseos je ra.

Jesús emo o tomei mo mbucherõ

3 ¹Jesús que oso mbia chumunuásaa cote ra. Huee que eo tomei mo ndiqui ee ra. ²Mbia que mae nguiatute quia Jesús rese ra. —Ma Jesús eo tomei mbucherõ. Sábado mose raque co. Sã embucherõ. Nandechẽ icuã icuã nda ee chã, i que eu mae nguiatute Jesús rese ra. ³Jesús que ñee eo tomei je cote ra. —Ehuã na u aa mbia ite re, i que ee ra. ⁴Jesús que ñee mbia je ra. —¿Mbae eturãte jẽje co tenda sábado mose re? ¿Coche nandeico mbae turã naa naa sábado mose re? ¿Coche nandeico mbae icuã naa naa co mose re no? ¿Coche mbia mbucherõ co mose re no? ¿Coche mbia iquia co mose re no? i que Jesús ñee mbia ja je ra. Mbia que ñee ãte echeẽ mose ra. ⁵Jesús que paama i mae mbia rese ra. Eya eãte que eriqui mbia chiã ãtã ndese ra. Ñee ngue eo tomei je cote ra. —Ndeo emee secuti, i que ee ra. O que emee Jesús cheẽ mose ra. Aque mosechi que eo nyerõ cote ra. ⁶Nyebe fariseos paama i nguiã Jesús je. Mbia mbucherõ mose sábado mose. Ndua ndua ja que Jesús i quia nonde ra. —Jesús nandeiquia rei, i tuchi que equia Herodes resenda ja je ra.

Mbia tubiriã nyoi Jesús rui

⁷Jesús que oso ama ndisha quti ra. Uchimbaaquiatu rese. Mbia tubiriã Galilea jenda que nyoi quia erui ra. ⁸Mbia que jirandu ja tuchi Jesús chisã turã ndese ra. Nyebe eriqui nguiã ngaẽ ngaẽ erea. Judea

jenda. Jerusalén jenda. Idumea jenda. Ama Jordán ndobeinda abe. Tiro rurubinda abe no. Sidón ndurubinda abe no. Ũquĩ ja que ngaẽ ngaẽ nguia erea ra. ⁹Nyebe Jesús ñee nguia uchimbaaquiato je. —Canoa mo jendura ino mbuquiche co rĩ, i que ee ra. Mbia quiato ngue emumbite nguia. ¹⁰Mbia que embucherõ cherõ tuchi quia nyii ra. Nyebe erasi ataque riqui nguia “taoco erese” i raque. Nyebe eriqui nguia ñimaña maña tuchi. “Nandeoco Jesús rese” i. ¹¹Aba checuayã icuã mae mose Jesús rese que ngoi ngoi quia ngũfã ndese ñee ee ra. —Dios riirĩ ndei nde, i que equia ñeemombo mombo ee ra. ¹²Jesús que ñee asite ee ra. —“Co rei Dios riirĩ co” jenyechĩ nda jẽ, i que ee ra.

Jesús mbia doce irabo uchimbaaquiaturã

¹³Jesús que nyui oso sita ibate mo ndese ra. “Jenyu” i que uchiirabobi je ra. Nyoĩ que erea ra. ¹⁴Ũquĩ doce que eirabo nguesendacuã nda. Embuchao chao sacua mondo Dios cheẽ nenei nenei. ¹⁵Uquirãcuã ngue emondo ee ra. Aba checuayã jea jea sacua mbia si. Mbia rasi chumumbara mbucherõ cherõ sacua. ¹⁶Ã ndei mbia echiirabo ã:

Simón (Pedro, i abe que ee ra.)

¹⁷Jacobo (Zebedeo riirĩ ndei Jacobo.)

Juan (Jacobó nongue rei Juan. Boanerges, i que ũquĩ ja je ra. “Ama sieu je riirĩ” i chõ nguia ee.)

¹⁸Andrés

Felipe

Bartolomé

Mateo

Tomás

Jacobo (Jacobó rei Alfeo riirĩ.)

Tadeo

Simón el Cananista

¹⁹Judas Iscariote (Aque que Jesús mondo mbia icuã je ra.)
Ũquĩ ja que Jesús irabo ra.

Aba checuayã quirãcuã Jesús quereco co, i raque mbia

Nyoĩ que ique tuchúaa cote ra. Uchimbaaquiato rese. ²⁰Mbia que ngaẽ ngaẽ tuchi quia erea no nda. Equiaru mose rocoĩ. Echimbaaquiato abe quiaru mose rocoĩ. ²¹Jesús nongue jirandu mose que echoĩ erea ra. Equiachã eriqui rei nguia ee. Nyebe eriqui rei nguia “nanderao” i raque. ²²Embesasa ngaẽ nguia Jerusalén si nae, ũquĩ ngue ñee ñee mbia je ra. Mbia mbuqueta queta Jesús rĩ. —Satanás quirãcuã je chõ Jesús riqui nguia aba checuayã icuã jea jea mbia si co, i rei que ñee icuã Jesús je ra. ²³—Jenyu rã tacheẽ jẽje, i que Jesús ee ra. —¿Mañi nda Satanás aba checuayã icuã jea mbia si re? Erimba chõ nyeresẽ. ²⁴Gobierno icuã icuã

mose nyue, ua rae. ²⁵Tuchuamo jenda icuã icuã mose nyue, ua ra eno. ²⁶Satanás icuã icuã mose nyue, equirãcuã nda ua no. ²⁷Satanás quirãcuã tuchite raque. Umbae rese ngueteãte raque. “Sembae chi turãte a”, i raque. Dios quiarei equirãcuã tuchi Satanás si. Dios Satanás mbae sirõ ja arõt e quia esi co. Dios Satanás quirãcuã mbutiã ja arõte quia co.

²⁸Tacheẽ nyecua jêje. Emo siqui icuã mose, Dios eicuã mbutiã arõte esi. Emo ñee icuã mose, Dios echeẽ icuã mbutiã arõte no. ²⁹Emo ñee icuã mose Espiritu Turã nii, ùquĩ icuã nguiatu ra Dios mbutiã eã mbei esi, i que Jesús ee ra. ³⁰—Jesús chianguĩ re aba checuayã icuã ndiqui co, i quiatu ngue mbia nguiã. Nyebe Jesús ñee nguiã ùquĩ.

Jesús nongue ngaẽ erea usi rese

³¹Jesús nongue que ngaẽ ndei erea ra. Usi rese. Chichõ ja chõ ngue itaicuee ra. —“Quiatuchu” ere Jesús je, i que emo mondo ra. ³²Mbia que chi jate ngoi Jesús jii ra. Ùquĩ ngue ñee ee ra. —Hue ndesi riqui nderequia itaicuee hue. Ndenongue rese, i que ee ra. ³³—¿Aba je chõ aico “taĩ” i chã? ¿Aba je chõ aico “senongue” i no ña? i que Jesús mbia je ra. ³⁴Jesús que mae ucheẽ andusa rese ra. —Ã je chõ aico nguiã “taĩ” i. Ñ je chõ aico nguiã “senongue” i no. ³⁵Ae Dios cheẽ mumbayã nguia nae, ùquĩ je chõ aico nguiã “senongue” i. Ùquĩ je chõ aico nguiã “taĩ” i no, i que Jesús ñee ee ra.

Emo mbae eĩ mombiquia mbiquia

4 ¹Jesús que mbia mbaaquiato quiatu si ama nimia ndese ra. Mbia que ñumunua tuchi u erese huee ra. Nyebe Jesús si nguiã ua canoa mo ye. Ngoi que huĩ huee mbia mbaaquiato quiatu ra. Mbia que chi jate ama nimia ndese ra. ²Jesús que mbia mbaaquiato quiatu tuchi quia ra. Ejemplos que esaã saã tuchi ee ra. ³—Jenyisaquia rã serese. Sã emo si rei mbae eĩ mombiquia mbiquia no. ⁴Sã emo ndiqui uqui uqui ñeenda rui no. Sã nguireĩ ndiqui ngaẽ eu no. ⁵Sã emo emo ndiqui uqui sãta arõ no. Sãta aronda suri jei raque. Ibi ererate quia ñene. ⁶Tenda ibate mose que eriqui ñimama mano nda. Erao eãte quia ñene. Nyebe mano jei nguiã. ⁷Sã emo ndiqui uqui uqui nyu réndaa no. Sã nyu abe riqui suri erese no. Nyu ruri que echati asi cuaẽ eriquisã nda. Nyebe ia eã ño nguiã. ⁸Sã emo ndiqui uqui uqui ibi turã no. Ùquĩ nguiatu que suri turã nda. I a turã ngue ra. Sã emo ia treinta no. Sã emo ia sesenta no. Sã emo ia cien no. ⁹Jëisa mose, secheẽ jeñandu turã na, i que Jesús ra.

Jesús ucheẽ mbiasa uchimbaaquiato je mbae eĩ nii

¹⁰Mbia ataque nyoĩ mose que Jesús ji jenda ñee ee ra. Echimbaaquiato doce rese. —Ndecheẽ embiasa tuchi rã ure je mbae eĩ nii, i que ñee Jesús je ra. ¹¹Jesús que ñee ee ra. —Mbia rerecua tuchi quiarei Ibatenda. Ae

chō asenei senei nguiã jêje ã. Secheẽ ambiasa asa bei tuchi quia jêje co. Mbia ataque quia siqui sereã erese co. Mbia ataque je aico ejemplos achō naa naa mbei co. ¹²Eanduchō sacua eicua turã nonde rocoĩ. Sã eriqui uba eãte Dios icha rui no. Dios eicuã mbutiã eã sacua esi, i que Jesús ñee nda. ¹³Jesús que ñee ee ra. —¿Secheẽ jêicuayãte mbae eĩ nii ñee mose jêje re? ¿Mañi jenye quiatu ra ejemplos ataque icua re no? ¹⁴Ae mbae eĩ mombiquia mbiquia nae, Dios cheẽ nenei neneisa rã ño aque re. ¹⁵Ae uqui uqui ñeenda rui nae, mbia Dios cheẽ andu chooñosa rã ño ùquĩ nde. Ae Dios cheẽ andu chooñote quia nae, ùquĩ ñiangui si chō Satanás ndiqui nguiã Dios cheẽ ndirō. ¹⁶Ae uqui uqui sita arō nae, mbia mo na ño ùquĩ no nde. Dios cheẽ andu mose, isi turã ndaque. Eyate raque erese nyii. ¹⁷Mbia icuã icuã mose ee Dios cheẽ nii, hui jei chō nguiã esi. Mbae rao eã naanguia chō ùquĩ nde. ¹⁸Ae uqui uqui nyu réndaa nae, mbia mo na ño ùquĩ no nde. Dios cheẽ andu turã ndaque. Siqui bei eã ño nguiã erui. ¹⁹Umbaerã achō ndese chō eriquichĩ nguiã ndua. “Mbaecha tuchite ra se”, i bei chō nguiã ndua ndua. Nyebe hui chō nguiã Dios cheẽ si. Nyebe Dios cheẽ ndiqui nguiã ia eã mbeite ee. ²⁰Ae uqui uqui ibi túraã nae, mbia mo na ño ùquĩ no nde. Ùquĩ nguiatu Dios cheẽ ñandu turã nguiã. Nyebe eriqui nguiã siqui beite erese. I a ia bei raanguia cote. Emo emo ia treinta. Emo emo ia sesenta no. Emo emo ia cien no, i que Jesús ra.

Tata rendi mbia resae ja

²¹Jesús que ñeembe ee ra. —Sã nandeico lamparina ati eã no. Sã nandeico emii eã mbaequi re no. Erendi checua chō nda nandemii. Mbia resae ja sacua. ²²Mbae checuayã nda nyecua ja emo mose. Mbia chiangui renda checuayã nda nyecua emo mose no. ²³Jêisa mose secheẽ jeñandu turã na. ²⁴Secheẽ nda jeñandu chooñoichĩ jê. Jê secheẽ mumbayã mose, taembaaquiatu i i tuchi. ²⁵Emo umbae rerequia mose, Dios ra embaerã mo mondobe ee. Emo embae eã mose, Dios ra embae sirō ja esi.

Dios rimba ñimbeta chō nguiã mbae eĩ na

²⁶Dios rimba ñimbeta chō nguiã mbae eĩ na. Sã emo mbae eĩ tiquia tiquia no. ²⁷Suri ra itō mocoinde cote. Eruri cuasu tuchi ra cote. Echa embusuriã ndaque. ²⁸Dios ae chō embusuri nguiã. Eracói rane. Ia chee. Ea ñetē nane. Ea cuasute cote. Ea ireĩ cote. ²⁹Ea ireĩ tuchi mose ra eishao shao cote.

Mbae eĩ na ño Dios rimba re

³⁰Mbae rã ño Dios rimba chã. Ejemplo mo tasenei jêje. ³¹Mbae eĩ na ño Dios rimba re. Sã mbia mo mostaza eĩ tiquia no. Eñetē tuchi raque mbae eĩ mo si. ³²Suri oso quia cote. Ecuasu tuchi chee. Ira rã ño cote re. Nguireĩ nguichi quichi chee erãquiã ndese. Eĩ si chō Dios rimba re. Ùquĩ

mii ndaque nyii. Ñimbeta tuchi cote. Mbae eĩ na, i que Jesús ñee mbia mbaaquiato ra.

Jesús ejemplos senei senei tuchi mbia je

³³Eĩ ño ngue Jesús quia mbia tubiriã mbaaquiato quiato ejemplos je ra. Mbia quenea tuchi chee que ra. ³⁴Ejemplos achõ ngue esenei senei mbia mbaaquiato sacua nda. Uchimbaaquiato je quiato que embiasa turã turã nda.

Jesús quiririã icuã icuã mbutiba; ama ndebera abe

³⁵Itondaru ramo mose que ñee uchimbaaquiato je ra. —Nyao ama ndisha robei, i que ee ra. ³⁶Ae canoa ye Jesús ñi mbia mbaaquiato quiato nae, aque ye sí que echimbaaquiato Jesús rerao ra. Mbia tubiriã ndecha. Canoa mo abe que nyoĩ quia erese ra. ³⁷Ama ndiite re mose que quiririã icuã icuã ndu ee ra. I rebera que ique ique tuchi quia canoa ye ra. Nyebe canoa ndiqui nguiã ñiimi serĩ tuchi ee. ³⁸Jesús que uque rei oso quia canoa ndiita quti ra. Uãquĩ ndua arõ ngue esi rei quia ra. Echimbaaquiato que emumba ra. —Urembaaquiatusa, echumumba. Nandemanochĩ nda re, i que Jesús je ra. ³⁹Jesús que nyuruã ñee asite quiririã je ra. —Ti ere cote, ama, i que ama ndebera je no nda. Quiririã ngue tiba echeẽ mose cote ra. Ama ndebera abe que tiba ra. ⁴⁰Ñee ngue uchimbaaquiato je cote ra. —¿Mbaerã jēsiquichete riqui re? ¿Seicuayãte equia ã nde? i que Jesús ñee ee ra. ⁴¹Siquiche bei que equia ra. Nyuruira tuchi que mae Jesús quiracuã ndese ra. —Quiririã Jesús cheẽ mumbayã ñochĩ. Ama abe echeẽ mumbayã ñochĩ no, i que ñee nyue ra.

Jesús aba checuayã icuã jea

5 ¹Ngasẽ ngue ama ndobei cote ra. Gadara, i que hue ib je ra. ²Canoa si Jesús nguichi mose que hue jenda mo tu erea ra. Aba checuayã icuã ngue siqui echiangui re ra. Mbia raaque tãsa si chõ ngue eru ngasẽ Jesús je ra. ³Mbia raaque tãsa bei que eriqui ra. Emo ngue echucua aroneate quia ra. Cadenas je abe que emo ndiqui ecua aroneate ra. ⁴Nyucua mocoĩte rei nda cadenas je raẽ. Ei nda echucua rei raẽ. Eo abe. Ucuasa nda endoso ndoso bei quia ra. Emo nda embutiba aronea tuchi quia ra. ⁵Ngata bei nda equia itondaru ra. Nyaashĩ mose abe. Tasẽ tasẽ mbei nda equia mbia raaque tãsa ra. Sita ibátee abe no. Sita je nda eriqui ñimbasi mbasite ra. ⁶İsho que mae Jesús rese ra. Uchã asi que eu ngoi nguiã ndese enonde ra. ⁷⁻⁸Jesús que ñee ee ra. —Esẽ u aque chiã si, aba checuayã, i que Jesús ñee ee ra. Aba checuayã ngue tasẽ tuchi ñee Jesús je ra. —¿Mañi ere ra equia seje re, Jesús? Dios ririĩ ño nde re. iSembasichĩ nda se jẽ! i tuchi que ee ra. ⁹—¿Mañi ndeje re? i que Jesús ee ra. —Etubiriã, i chõ nguiã seje. Ure cuabẽte quia ñene, i que ñee Jesús

je ra. ¹⁰—Isho ra uremondochĩ, i tuchi que aba checuayã ñee Jesús je ra. ¹¹Chiasu socoi tubiriã ngue chi quiaru huee ibi ibátee ra. ¹²Nyebe aba checuayã icuã ñee ja nguiã Jesús je. —Uremondo ja rã chiasu socoi chiangui re, i tuchi que equia Jesús je ra. ¹³Eno, i que Jesús ee ra. Nyebe aba checuayã usẽ ja nguiã amei ñia si cote. Chiasu chiangui re que echoi ja cote ra. Dos mil rei chiasu. Chiasu que uchã ja choi nyiichere ama nimia mbucu rĩ nda. Ama ndisha ye que echoi ja mano nda.

¹⁴Chiasu raarõsa mundite que ra. Uchã ngue echoi mbia mbiirandu randu ja ra. Sucha tubiriã jenda mbiirandu. Ishonda abe mbiirandu no. Mbia que ngaẽ ngaẽ nguia jirandu turã cote ra. ¹⁵Ngasẽ ngue ecuaẽ Jesús je ra. Ae aba checuayã icuã nguereco uchiangui re nyii nae, aque abe que siqui huee ee ra. Huiirao resebe que eñi ngoi ra. Earacuate que ee cote ra. Nyebe mbia riqui nguiã siquichete. ¹⁶Ae mae erese nae, ùquĩ ngue ñee ñee mbia je ra. Mbia mbiirandu chiasu socoi rese. Ae aba checuayã quereco quia nyii nae, aque rese abe no. ¹⁷—Eso rã urerecha urerecua si, i jate que hue jenda ñee Jesús je ra. ¹⁸Ae aba checuayã quereco quia nyii nae, aque que ñee Jesús je ra. Jesús ua mose canoa ye. —Nderese bei chõ taso se jẽ, i rei que ñee Jesús je ra. ¹⁹Jesús que ñee ee ra. —Tei. Quiatu rei ndechuchúaa. Quiatu ñee nderesenda je. “Dios chõ sembucherõ nguiã. Eya eã tuchite que eriqui serese ra”, ere oso nderesenda mbiirandu, i que Jesús ee ra. ²⁰Amei ngue oso sucha mbuchesea sea cote ra. Mbia Decápolis jenda mbiirandu randu ja. —Jesús chõ sembucherõ nguiã, i ja jate que equia mbia je ra. Mbia que nyuruirate quia mae erese ra.

Jesús Jairo riirĩ mbucherõ; ari mo abe mbucherõ

²¹Jesús que tu si iasa sobei si canoa ye ra. Mbia tubiriã ngue ngaẽ ngaẽ nguia erea ra. Ama nimíaa eriquibe mose. ²²Judíos rerecua mo ngue tu erea ra. Jairo, i que ee ra. Judíos munua nuasa que ae ra. Jesús nonde que eru ngoi ngúíã ndese ñee ee ra. ²³—Qui seriirĩ si quia mano qui. Nyao rã ndeo terechono earõ. Embucherõ sacua, i tuchi que equia Jesús je ra. ²⁴Jesús que oso erese cote ra. Mbia tubiriã abe que nyoĩ quia ñimajaã tuchi erui ra. ²⁵Ari rasi mo abe que oso quia erui ra. Eruqui nda uchẽ mbei quia ee ra. Doce años nyee. ²⁶Ngasi nda esaã tuchi quia ra. Erasi rea reasa nda etea tea jate rei quia raẽ. Umbae nda emondo mondo ja chee ngasi rea reasa je ra. Nyerõ jiri jiriã tuchi que ra. Erasi i i tuchi chõ ngue ra. ²⁷Jirandu chee que Jesús rese ra. Equite qiti que esi mbia joõ nda. Oco que oso eirao rese ra. ²⁸—Eirao achõ ndese se oco mose, acherõ nda se, i nda ra. ²⁹Aque mose tuchi que eruqui ti i ee cote ra. Ngasiã ngue eicua uchiangui re cote ra. ³⁰—Sequirãcuã ngue mbia mo mbucherõ nda, i que Jesús uchiangui re ra. —¿Aba oco seirao rese re? i que mae uquite qiti ra. ³¹Echĩmbaaquiato que ñee ee ra. —Mbia tubiriãte nyeresẽ. Ñimajaãte nyeresẽ. ¿Mbaerã ereico “¿aba oco serese re?” i re? i

que ee ra. ³²Jesús que nyuruba ruba mae nda. —¿Aba oco serese re? i. ³³Ari que jirandu tuchi ucherō ndese ra. Eireñte que titi titi i huñ ee ra. Ngoi que ngũfã ndese Jesús resa quitu ra. Mbae que esenei ja ee cote ra. ³⁴Jesús que ñee ee ra. —Seicuate que se ra. Nyebe arembucherō nguiã. Ndeya chō eso cote. Nderasi ra tu si eã ndeje, i que Jesús ñee ee ra.

³⁵Echeẽ mose chite que emo ngaẽ Jairo chuchua si ra. —Nderiirĩ ngue mano cote ra. ¿Mbaerã nda Jesús ererao ndechuchua cote re? i que ñee ee ra. ³⁶Jesús que echeẽ ñandu ra. Ñee ngue Jairo je cote ra. —Ndeya eã techĩ nda jẽ. Seicua chō se jẽ, i que Jesús ee ra. ³⁷Jesús que oso eraaque rea cot e ra. Uchimbaaquiato tres que equerao ra. Pedro. Jacobo abe. Juan abe no. Jacobo nongue que Juan nda. Ũquĩ mii ño ngue equerao era ra. ³⁸Ngasẽ ngue Jairo chuchua cote ra. Mbia que chi ja nyeseo ãquẽ ndaaque rese ee ra. Nyiibu tuchi que eu ra. ³⁹¿Ique que oso ñee mbia je ra. —¿Mbaerã jẽingo nyiibute re? ¿Mbaerã jẽingo nyeseo re? Ñquẽ manoãte resẽ. Uque chō u co resẽ, i que Jesús ñee mbia je ra. ⁴⁰Mbia que iquia iquia chō ee ra. Jesús que mbia mondo ja chee itaicuee ra. Eru rese que esi ique eririĩ ndaaque rea ra. Esi abe rese. Nguesenda abe rese. ⁴¹Eraaque o que eisi ñee ee ra. —Echuruã, Ñquẽ, i que ee ra. ⁴²Echeẽ mose tuchi que ãquẽ juã ngata cote ra. Etiarõte que ra. Doce años que ra. Mbia que nyuruira tuchi mae erese ra. ⁴³—“Jesús que co raaque mbuquera ra”, jenyechĩ nda emo je jẽ, i que Jesús mbia je ra. —Nderiirĩ embuquiaru cote, i que ee cote ra.

Mbia Nazaret jenda Jesús isiteã

6 ¹Hue si que esi nguécuaa ra. Echimbaaquiato abe que nyoĩ erese ra. ²Sábado mose que mbia mbaaquiato quiato judfos chumunuásaa ra. Mbia que nyuruira ja tuchi u echeẽ andu ra. Ñee ñee ngue u nyue ra. —¿Mangue eriqui ñimbaaquiato tuchite re? ¿Mañi equia mbae icua ja tuchite re? Nandemae sayã naa naa tuchichĩ. ³Ira mbitirō tirōsa chō ndaque. María ririĩ ño ndaque. Jacobo nongue chō ndaque. José abe no. Judas abe no. Simón abe no. Á echari enongue riqui ja raque nanderese ã, i que mbia ra. Nyebe mbia Jesús cheẽ andu sereã nea nguiã. ⁴Jesús que ñee ee ra. —Dios cheẽ mbuchecuasa ishonda cheẽ nguia ra mbia isi turã mbei. Nguécua jenda cheẽ achō nguia ra eisi turã eã. Ngõngue cheẽ achō nguia ra eisi turã eã no, i que Jesús ñee nguécua jenda je ra. ⁵Jesús que mbia mae sayã saã saã aroneate quia huee ra. O que echono mbia rasi mii mii arō embucherō nda. ⁶Hue jenda mbia que chi Jesús icua eãte ra. Nyebe Jesús nyuruira tuchi nguiã mae erese. Sucha tubiriã mbuchesea sea que equia mbia mbaaquiato quiato ra.

Jesús uchimbaaquiato doce mondo ucheẽ nenei nenei sacuaĩ

⁷“Jenyu” i que uchimbaaquiato doce je ra. Nyeremo nemo ngue embuchao chao mondo ra. Uquirãcuã ngue emee mee ee ra. Aba

checuayã icuã jea jea sacuã mbia chianguí si. 8-9—Mbae mo nda jendaochĩ icua. Mbae riru mo abe ra jendaochĩ. Jenyiturã mo abe ra jendaochĩ no. Mbae isiquia abe ra jendaochĩ. Jēiyao nongue mo nda jendaochĩ. Jēirao nongue mo abe ra jendaochĩ no. Jenyitochoquia mii ño jenda. 10Jengasẽ mose sucha tubiriã mo, aque tuchia mii ño jēingo uque. Tuchia ra jembuchesea seate chĩ jēingo mose huee. Ae ra jengue nyii nae, hue tuchia bei chõ jēingo uque. 11Sucha tubiriã jenda mo jēisi sereã nea mose, jēhui chõ esi. Hue jenda jeñee andu sereã mose, jēso chõ hue si. Jēi tubi jembutomoto tomo ee. Hue jenda huicuã icua sacuã. Tacheẽ nyecua jēje. Ae ra jeñee isi sereã nae, ũquĩ nda Dios mbasi tuchi. Uquiatoã nda embasi ja aque mose. Sodoma jenda ra Dios mbasi raque. Gomorra jenda abe no. Ae jeñee isi sereã nae, ũquĩ nguia ra embasi tuchi Sodoma jenda si. Gomorra jenda abe si, i que Jesús ñee uchimondobi je ra. 12Nyoĩ nyoĩ ja que equia Dios cheẽ nenei nenei mbia je ra. —Jendua si Dios rese, i ite que equia mbia ja je ra. 13Aba checuayã icuã ngue eja jea tuchi quia mbia chianguí si ra. Mbae eĩ quira que equiti quiti quia mbia rasi rese ra. Mbuherõ ja que ra.

Mbia Juan el Bautista iquia

14Mbia que jirandu ja Jesús rese cote ra. Herodes abe que jirandu erese ra. Ererecua que ae ra. Juan el Bautista Jesús riqui reĩ Herodes je reaẽ. —Juan ndaaque que quera si ra. Nyebe eriqui nguia mbae raã jate, i rei que Herodes ra. 15Elías Jesús riqui reĩ emo je reaẽ. Dios cheẽ mbuchecuaa ñiinda Jesús riqui reĩ emo je re no aẽ. 16Herodes que jirandu Jesús rese ra. Juan el Bautista eriqui reĩ nguia ee. —Juan ño eriqui re. Ae ãquĩ achisia. Quera si chõchĩ ere, i rei que Herodes ra. 17-18Herodes Juan mondo quiatu quia carcel nyii reaẽ. Nyucua nda cadena je ra. Paama i nda Juan je ra. —iNde ndenongue ninisi erereco aroneate jē! i quiatu que Juan ñee ee nyii ra. Herodes siqui mose nõngue ninisi rese. Herodías, i que enongue ninisi je ra. Felipe, i que enongue je ra. 19Herodías que Juan ucuayãte quia ra. —Taiquia, i rei que equia ra. 20Herodes bite rei que Juan ñee andu ra. Icuayã jiri rei que ra. —Juan turãte que ra jē, i que equia Juan nii nda. Nyebe eriqui nguia ireĩ ireite esi. Nyebe Herodías Juan iquia aroneate nguia. 21—Co mose chõ jē, i que Herodías Herodes mbae cumpleaños mose cote ra. —Jenyu quiaru serese, i que Herodes mbia rerecua ja je ra. Ererecua Galilea jenda ja je. 22Aque mose que Herodías ririĩ nyuruqui ruqui mbia je ra. Nyucuaaque que ae ra. Herodes ia tuchi que mae nyucuaaque nyuruqui rese ra. Ñee ngue nyucuaaque je ra. —¿Mbae ra amee ndeje re? Echeẽ ño seje. 23“Sebite co” nde i mose, aque tamondo ndeje. Sembae ataque tamondo ja ndeje ndebi mose. Acheẽ ñoñoa ño nguia ndeje a, i que Herodes ñee nyucuaaque je ra. 24Nyucuaaque que oso ñee usi je ra. —¿Mbae “embu seje” ae ra ee re?

í que ñee usi je ra. —“Juan el Bautista ãquĩ ño embu seje”, ere chõ ee, í que esi ra. ²⁵Nyebe que esi ñee Herodes je cote ra. —Juan el Bautista ãquĩ emee na seje plato ye, í que ñee ee ra. ²⁶Herodes chosoi que oso serĩ tuchi echeẽ andu mose ra. —Acheẽchĩ se quia ee. A seresenda chi ja quiaru serese a resẽ. ã seandu ja chõchĩ. Nyebe ra secheẽ ambuchebi eã ee, í que Herodes uchiangui re ra. ²⁷Soldado mo ngue emondo cote ra. —Quiatu Juan ìquia. Eãquĩ eru seje, í que ñee soldado je ra. ²⁸Cárcel que esi Juan ãquĩ sia cote ra. Eãquĩ ngue equeru plato ye nyucuaaque je cote ra. Nyucuaaque que emee usi je cote ra. ²⁹Juan ñĩmbaaquiату jirandu mose que echoi eraaque rea cote ra. Ñono ngue sita ndoro ji ye ra.

Jesús mbichae tubiriã saã mbichae miì je

³⁰Ae Jesús mondo quia uchĩmbaaquiату, ùquĩ ngue ngaẽ si ee cote ra. Uchisaã ngue esenei senei cuaẽ ee ra. —Eĩ ure que mbia mbaaquiату quiату ra, í que ecuaẽ Jesús mbiirandu ra. ³¹Mbia tubiriãte que ngaẽ ngaẽ nguia ñĩndecua ndecua erea ra. Equiaru mose rocoĩ abe. Nyebe ñee nguiã uchĩmbaaquiату je. —Nyao rã mbia eãsa, jenguenea ucua mbirĩ, í que ra. ³²Ae ae que nyoĩ canoa ye mbia eãsa ra. ³³Mbia tubiriã tuchi ngue mae ñochĩ nguiã echoi rese. Jesús icua chõ ngue ra. Mbia que nyoĩ uchã ibi rĩ nda. Sucha jenda ja. Ùquĩ nane ngue nyoĩ ngasẽ Jesús raarõ ama nimia nda. ³⁴Jesús que usẽ canoa si cote ra. Mbia tubiriã ndese que mae nda. Eya eã tuchite que erese ra. Oveja raarõ iriã na nguiatu que mbia chi ee ra. Mbia que embaaquiату quiату tuchi cote ra. ³⁵Tenda oso mose que echĩmbaaquiату ñee ndei ee ra. —Tenda osote resẽ. Mbia chuchua mo ãte a resẽ. ³⁶Mbia chiurã eã abete a resẽ. Mbia embui mondo uchiurã ndequia requia sacua sucha achi jenda rea rea, í que ñee Jesús je ra. ³⁷—Jeño mbae jemondo ee echĩurã, í chõ ngue Jesús ñee ee ra. —Tei. Mbae quia ra aba mondo ee. Mbia tubiriã tuchite quia ñene. Mbae isiquia tubiriã tuchi je quia nda aba mbae isi rei nguiã ña. Mbia chayãte chõ eno nde, í que ñee Jesús je ra. ³⁸—¿Manya mbichae jendeco ùquĩ nde? Jẽso mae erese no, í que Jesús ee ra. Emo ngue oso mae erese eicua ra. —Cinco mbichae riqui i co. Sira nyeremo abe, í que echĩmbaaquiату mo ñee ee ra. ³⁹—Sã mbia ngoi ngoi ja quiata tose. Echesea sea, í que Jesús ra. ⁴⁰Mbia que ngoi ngoi ja nyesea sea cote ra. Cincuenta jaaja. Cien abe no. ⁴¹Jesús que mbichae cinco sirõ cote ra. Sira nyeremo abe no. Ibei rese que mae gracias í Dios je ra. Mbichae que esiquio quio cote ra. Mee mee ngue uchĩmbaaquiату je ra. —Jemee mee mbia je, í que uchĩmbaaquiату je ra. Sira nyeremo abe que esiquio quio mbia ja je ra. ⁴²Mbia ja que eu tuchi ra. Ñĩmbio chee que ra. ⁴³Mbia chiu sique tubiriã tuchi que ra. Mbichae rire. Sira rire abe no. Doce iru que mbia mombisẽ esique sique je ra. ⁴⁴Cinco mil hombres que mbia mbichaecua ra.

Jesús ngata i arõ

⁴⁵Aquere que Jesús uchĩmbaaquiату mondo ja canoa ye ra. —Jẽ nane jẽso Betsaida sobei. Mbia tambui turã na mondo uchuchúaa se nyii, í

que ra. ⁴⁶Jesús que mbia mbui turã mondo cote ra. Ae ae que oso sita ibátee cote ra. Ñee sacua Dios je. ⁴⁷Huee que ae ae riqui itondaru chee ra. Canoa yenda que chi bei ama ndiite rĩ nda. ⁴⁸Echimbbaaquiato que pare pare i canoa ibu ra. Quiririã ngue eichu ichute eruba quiti ra. Jesús que mae erese ishote ra. Nguira ñee mose que esi eriichã nda. I arõ ngue esi quia ngata ra. Nyucuaño nda eña nde. ⁴⁹Mbia aingue eriqui reĩ nguiã echimbbaaquiato je. Ngata mose i arõ. Nyebe tasẽ tasẽ nguiã. ⁵⁰Echimbbaaquiato chiã ngue cuãacuã i tuchi mae erese ra. —Jësiquichechĩ nguiã. Jëya chõ ae. Se chõ nyeresẽ, i que Jesús ñee ee ra. ⁵¹Ua que canoa ye embirõ cote ra. Quiririã ngue tiba cote ra. Echimbbaaquiato que nyuruirã tuchi u mae erese ra. ⁵²Jesús mbichae mbeta quia nae, ùquĩ ngue echimbbaaquiato icuayãte uchiangui re ra. — Dios riirĩ ño eriqui reaẽ, i ãte que eicuayã nda. Eãquĩ ãtãte chõ ngue ra.

Jesús mbia Genesaret jenda mbucherõ cherõ

⁵³Ngasẽ nyee que sobei cote ra. Genesaret, i que hue ibi je ra. ⁵⁴Jesús usẽ mose canoa si que mbia eicua jei ra. ⁵⁵Mbia que nyoĩ ja uchã tuchia mbuchesea sea ra. Erasi rurucuaẽ cuaẽ sacua Jesús je, erua resebe. ⁵⁶Jesús cuatásaa que mbia riqui erasi rurucuaẽ cuaẽ ee ra. Sucha tubiriã jenda jaaja. Sucha miĩ miĩ jenda jaaja abe no. Turuquia jenda abe no. Ùquĩ ja que erasi curucuaẽ cuaẽ nguiã ñono Jesús jii ra. —Sã erasi oco oco ja rã ndeĩrao ai rese, i jaaja que ñee Jesús je ra. Ae oco erese nae, ùquĩ ngue nyero ja ra.

Mbia chiangui renda ae chõ embiicuã nguiã

7 ¹Aquere que fariseos mo ngaẽ ñee Jesús je ra. Embesasa mo abe, ae ngaẽ Jerusalén si. ²Jesús chimbaaquiato mo ngue quiaru quiaru echoĩ quiiriã ee ra. —¿Mbaerã jëingo quiaru jenyoi quiiriã nde? Nanderamei ñee ndui si eã ño jëingochĩ nde, i que ñee asite ee ra. ³Fariseos quiarei nyoĩ bei quiaru nonde. Judfios ja abe no. —Nandechoĩ eã mose ra nandechiã mondeite, i rei equia ã. Ngãmei ñee nguire eriqui ùquĩ naa naa mbei ã. ⁴Echoĩ quiiriã mose eriqui quiaruã ã. Ngaẽ mose plaza si eriqui nyoĩ nyoĩ tuchi quiaru nonde ã. Ngãmei ñee nguire chõ eriqui nguiã mbae raã ja ã. Sã eriqui uyuquia irei irei no. Ñio abe no. Irachaẽ abe no. Uquisa abe no. ⁵Nyebe fariseos ñee nguiã Jesús je. —¿Mbaerã ndechimbbaaquiato riqui eĩ eã nanderamei ñee nguire re? ¿Mbaerã eriqui quiaru uchoĩ quiiriã nde? i que fariseos ñee Jesús je ra. Embesasa abe no. ⁶Jesús que ñee ee ra. —Isaías que embesa jeniĩ cose ra. Eĩ ngue embesa ra:

À mbia riqui ñee turãte raque seje ã.

Uchiangui re quia eriquiãte nguiã serese ã.

⁷Ñee turãte raque equia seje ã. Amei ñee achõ ño esenei seneichĩ nguiã mbia je.

Dios cheẽ mii nenei nenei ndocoĩ ee, i que Isaías embesa jeniĩ nda. ⁸Jenamei ñee achõ ño jesenei seneichĩ nguiã mbia je ũquĩ. Dios cheẽ nenei nenei ndocoĩ ee.

⁹Dios cheẽ jemumba mumba chõ chĩ nguiã ã. Nanderamei ñee ndese chõ jẽingochĩ oote ã. ¹⁰Moisés cheẽ ndui turã eã ño jẽingochĩ ã. Sã Moisés ñee mbia je no: “Jeturã ño nguia jendu je jẽ. Jẽsi je abe no. Emo ñee icuã mose ngu je, ũquĩ jẽiquia chõ. Emo ñee icuã mose usi abe je, ũquĩ abe jẽiquia no”, sã i Moisés no. ¹¹Jẽ nguia jẽingo nguiã Moisés cheẽ abi abite ã. Sã jẽingo ñee no. “Ae nda amee nei jẽje, ũquĩ ngue amondo ja Dios je ra”, i mose emo ñee ngu je, “coche ñene” jentye chõchĩ nguiã ee. Mbae mee eã mose ngu je. Usi abe je. Nyebe jẽingo nguiã mbia mbaaquiātu icuã icuã ũquĩ. ¹²¿Mbaerã jẽingo mbia riquisã quisãte mbae meese mose usi je re? Ngu je abe no. ¹³Nanderamei ñee achõte jẽsenei seneichĩ nguiã jendiirĩ je ã. Nyebe jẽingo nguiã Dios cheẽ mbuquiachãte jendiirĩ si ã. Mbae icuã atate jẽsaã saã nguia ã, i que Jesús fariseos je ra. Embesasa abe je. ¹⁴—Jenyu secheẽ andu, i que Jesús mbia ja je ra. —Secheẽ jẽicua rã. ¹⁵Mbia chiu embiicuã eã nguiã. Echiangui renda chõ embiicuã nguiã. Echiangui renda chõ usẽ nguiã echuru rĩ echeẽ mose. Ũquĩ ño embiicuã nguiã. ¹⁶Jẽisa mose, secheẽ jeñandu turã na, i que Jesús ra. ¹⁷Jesús que mbia secha oso ique tuchúaa ra. Echimbaaquiātu que ñee ee cote ra. —Erecheẽ ngue namo, “ũquĩ nda mbia mbiicuã” ere que, ũquĩ embuchecua rã ndecheẽ ure je, i que ñee Jesús je ra. ¹⁸Jesús que ñee ee ra. —¿Jẽ abe jẽicuayãte quia re? Ae mbia u quia nae, ũquĩ mbia mbiicuã eã nguiã. ¹⁹Iqueã nda oso echiangui re. Eriye ye chõ eriqui nguiã oso. Echique rui chõ eriqui nguiã oso. Usẽ nyee, i que Jesús ñee uchimbaaquiātu je ra. —Mbia chiu turã ja, i chõ nguiã. ²⁰—Mbia chiangui renda chõ embiicuã nguiã usẽ mose echuru rĩ. ²¹Aba chiangui renda quia aba mundua icuã icuãte nguiã. Nyebe eriqui nguiã siqui emo ninisi rese. Emo ndu rese abe no. Siqui siqui eruã ndese abe no. Mbia abe iquia iquia. ²²Mbae abe mbuquiachã quiachã no. “Aque raã nda sembaerã ñã”, i emo mbae je no. Mbae icuã ñumumbara raã naa ja. Mbia abe mbiirĩ irĩ no. Mbae icuã osei osei bei. “Se quiātu ae”, i mbae je. Ñee icuã icuã no. Ucuasu abe raã naa no. Mbae icuã naa ja chooño. ²³Mbia chiangui renda icuã ja chõ ũquĩ nde. Ũquĩ ño mbia mbiicuã icuã nguiã ũquĩ ao ao mose, i que Jesús ra.

Ari mo Jesús icua

²⁴Jesús que nyoĩ hue recha cote ra. Ngasẽ ngue Tiro jii cote ra. Sidón jii abe no. Ique que oso tuchia mo nda. —Sã mbia jiranua serese, i rei que ra. Mbia qu e jirandu chõ erese ra. ²⁵Ari mo abe que jirandu erese ra. Eriirĩ ngue aba checuayã nguereco uchiangui re ra. Ari que tu Jesús rea ra. Ngũiã ndese que ngoi ejii ra. ²⁶Sirofenisia jenda que ae ra. Judío

eã tuchi que ae ra. Griego cheẽ ño ngue echeẽ nde. —Aba checuayã icuã ejea rã seriirĩ si, i tuchi que Jesús je ra. ²⁷Jesús que ñee ee ra. — Judíos rese rane taico mbae raã naa. Ahui aronea judíos si, mbae raã naa mbiamo je, i que Jesús ee ra. ²⁸Ari que ñee ee ra. —Aicuate raque se, Sererecua. Mbiamo ndaque ure. Judíos eã ndaque ure. Ure je abe chõ mbae esaã ae. Seriirĩ embucherõ seje ae, i que ari ñee ee ra. ²⁹Jesús que ñee ee ra. —Erecheẽ turãte. Quiatu rei. Nderiirĩ ngue nyerõ no, i que ee ra. ³⁰Ari que oso uchuchúaa cote ra. I que eriirĩ u ngua ye ee cote ra. Aba checuayã icuã usẽ ño ngue a esi reaẽ.

Jesús eisayã mbucherõ

³¹Jesús que nyebi Tiro rurubi si ra. Sidón ngue etasamo nda. Ama ndisha Galiléaa que esi ra. Decápolis rĩ ngue esi ra. ³²Eisayã mo ngue mbia curucuaẽ ee ra. Echeẽ aquiatuãte abe que ra. —Ndeo echono earõ embucherõ, i tuchi que mbia Jesús je ra. ³³Jesús que eisayã nguerao pe jiri mbia recha ra. O que emingue mondo eisacua rereco chobei ra. O que embia ngüendi je ra. Mondo que echuru rĩ cote ra. ³⁴Soboiba que ibate cote ra. Jiabute que ñee ee ra. —Esoro, eisacua, i que ee ra. ³⁵Eisacua que soro cote ra. Echuru abe que nyerõ cote ra. Ñee ngue cote ra. ³⁶—Emo nda jembiiiranduchĩ jẽ, i rei que Jesús ñee mbia je ra. Mbiam que ñmbiirandu i i tuchi ra. ³⁷Mbiam que ñee ñee nyue Jesús riĩ nda. —Mbae raã turã turã ja tuchichĩ equi a co. Eisayã abe isa ndoro chee no. Echeẽ ngüfã abe mbucheẽ nyee no, i ja tuchi que mbia quia nyuruira mae erese ra.

Jesús mbichae tubiriã saã mbichae mii je

8 ¹Mbiam que ñumunua tuchi Jesús je aque mose ra. Ñee ngue uchimbaaquiato je ra. ²—Seya eãte aico ã mbiam tubiriã ndese co. A echi arete serese tres días a. Echiurã mo eãte mbae mo aa. ³Eriacuã amondo sereãte echuchúaa. Ngasẽ ãte chõ ndae. Ishote si ecuaẽ aa resẽ. Nandembuquiaru chõ aa, i que Jesús ra. ⁴Echimbaaquiato que ñee ee ra. —Turuquia re chõ nandeico a resẽ. ¿Mañi nda aba ã mbuquiaru ja re? i que ñee Jesús je ra. ⁵—¿Manya mbichae jendeco re? i que Jesús ee ra. —Siete, i que ee ra. ⁶Jesús que mbiam mbucoi ja íbii ra. Mbichae siete que eisi ja o je cote ra. Gracias i que Dios je cote ra. Mbichae qu e esiquio quio mee uchimbaaquiato je cote ra. Úquĩ ngue embuchao chao mbiam tubiriã je cote ra. ⁷Sira ñetẽ mii abe que equereco ra. Gracias i que Jesús Dios je cote ra. —Sira abe jembuchao chao mbiam je, i abe que ee ra. ⁸Mbiam que eu ja ñimbio chee ra. Echiu sique que emunua nua ja ra. Siete iru que emombisẽ nyee ra. ⁹Mbichaecua rei mbiam cuatro mil. Jesús que embui turã mondo cote ra. ¹⁰Canoa ye que Jesús ua uchimbaaquiato rese cote ra. Nyoj que Dalmanútaa ra.

Mbia mae sayã eteacuquia ure je, i fariseos

11—Tã nande rã Jesús je, i que fariseos cuaẽ ñee ñee ee ra. —Mbia mae sayã esaã na ure je. Ñ nda “Dios chimbu” ure tuchi ndeje, i rei que ñee Jesús je ra. 12 Jesús que iabu tuchi ñee nda. —¿Mbaerã mbia riqui “mbia mae sayã esaã ure je” i tuchi re? Tacheẽ nyecua jêje. Mbia mae sayã mo nda atecuquia eã tuchi jêje, i que Jesús ñee ee ra. 13 Oso que mbia recha cote ra. Iasa que echoi sobei cote ra.

Fariseos mbia mbaaquiato icuã, i Jesús

14 Jesús chimbaaquiato que uchiurã curuchoi eã nda. Tesarei que esi ra. Mbichae mii tuchi que equeru huee ra. 15 Jesús que ñee ee ra. —Mbichae mbuchimatãsa rã ndei fariseos cheẽ. Herodes chimbaaquiato cheẽ abe no. Ñquĩ ñee ndese ra jëingochĩ jê, i que Jesús ee ra. 16—Mbichae quiato ngue nanderuã nguiã. Nyebe eriqui nguiã ñee nande je ñquĩ, i rei que echimbaaquiato ñee nyue ra. 17 Jesús que echeẽ ñee icuate ra. Nyebe ñee nguiã ee. —¿Mbaerã jëingo “mbichae nanderuachĩ” i re? ¿Ae riĩ aico ñee jêje nae, ñquĩ jëicuayã mbeite quia re? ¿Jeñia átã mbeite eriqui re? 18 Jëisate raque. ¿Secheẽ jeñanua mbeite quia re? Jendesate raque. ¿Sechisaã jëicuayã mbeite quia re? 19 Se mbichae cinco mbeta mose mbia cinco mil je, ¿manya iru jemombisẽ mbichae sique sique je re? i que Jesús ee ra. Doce, i que ee ra. 20—Mbichae siete mbeta mose mbia cuatro mil je, ¿manya iru jemombisẽ esique sique je re no? i que Jesús ee ra. Siete, i que ee ra. 21—¿Jëingo secheẽ icuayã i ite ã nde? i que Jesús ee ra.

Jesús eresayã mo mbucherõ

22 Nyoi que Betsaida cote ra. Mbia que amei ndesayã mo ngurucuaẽ Jesús je ra. Oco sacua ere se embucherõ. 23 Jesús que eo isi serao pe jiri sucha si cote ra. Ngüendi que equiti eresa rese ra. O que echono earõ nda. —¿Eremaete mbae rese cote re? i que ee ra. 24 Eresayã ngue mae cote ra. —Mbia rese amaete cote. Ecuata rese amaete. Ira raãte mbia seje, i que eresayã nda. 25 Jesús que o chonombe eresa rese ra. Mae turã ngue cote ra. Nyerõ tuchi que cote ra. 26 Jesús que embui mondo uchuchúaa ra. —Eresochĩ nda sucha ite rĩ jê, i que ee ra.

Cristo chõ nde resẽ, i Pedro Jesús je

27 Jesús que nyoi Cesarea de Filípoo cote ra. Huee que ñee uchimbaaquiato je cote ra. —¿Aba aico reĩ mbia je re? i que ee ra. 28 Echimbaaquiato que ñee ee ra. —Juan el Bautista ereico reĩ nguiã mbia je co. Elías ereico reĩ nguiã emo je no. Dios cheẽ nenei neneisa mo ereico reĩ nguiã emo je no, i que echimbaaquiato ñee Jesús je ra. 29—¿Aba aico reĩ jêje co re? i que Jesús ee ra. —Cristo chõ nde resẽ, i que Pedro ñee ee ra. 30—Jeñeechĩ nda mbia mo je ñquĩ jê, i que Jesús ee ra.

Mbia ra seiquia, i Jesús

³¹Jesús que umano nonde senei senei uchimbaaquiatsu je ra. —Mbae rasi ra asaã tuchi. Judíos ramei icuã icuã tuchi ra seje. Sacerdotes rerecua abe no. Embesasa abe no. Seiquia rae. Tres días mose ra aquera si, i que ñee uchimbaaquiatsu je ra. ³²Jesús que ñee nyecua tuchi ee ra. Nyebe Pedro Jesús rerao nguiã suruicha. —¿Mbaerã erecheẽ ùquĩ nde? Mbia ra ndeiquiayã, i rei que Pedro ñee asite Jesús je ra. ³³Jesús que uba mae uchimbaaquiatsu rese ra. Ñee ngue Pedro je ra. —Ehui chõ sesi, Satanás. Mbia ndua ndua rã ño ereico nguiã ndua. Dios ndua ndua rã eã, i que ñee Pedro je ra.

³⁴Jesús que ñee uchimbaaquiatsu ja je cote ra. Mbia abe je. —Emo siquise mose serui, sã hui ja mbae ubi si. Sã cruz rui umbaerã se rã si. Sã eriqui serui bei cote. ³⁵Emo ndua bei mose nguenco rese, ereco ra ua esi. Emo hui mose nguenco si seje, ùquĩ nda siqui bei. ³⁶Emo nguenco mumba chooño mose, eya eã mbei rae. Mbaecha rete raque. ³⁷Emo nguenco mumba chooño mose, mbae mo eãte ereco ribishorõ sacua. ³⁸Emo ireĩ ireĩ mose sesi mbia icuã ndésaa, se abe ra aireĩ ireĩ esi. Emo ireĩ ireĩ mose secheẽ si, se abe ra aireĩ ireĩ esi, sechu mose mbia rerecuarã. Dios ra sembu si íbii uquiracuã je aque mose. Ibatenda rese ra achu ángeles, i que Jesús ee ra.

9 ¹—Tacheẽ nyecua jêje. A jengu a nae, jemo nda jemae sechu rese. Achu ra mbia rerecuarã tuchi cote. Jemo jemano eã mose ra achu mbia rerecuarã tuchi cote, i que Jesús ee ra.

Jesús nyiicuabo uchimbaaquiatsu résaa

²Tenda seis uare que Jesús uchimbaaquiatsu mo nderao sita ibátee ra. Pedro. Jacobo. Juan abe no. Ùquĩ ngue equerao ja mbia tiásaa ra. Jesús que nyiicuabo erésaa huee ra. Enininya tuchi que ee ra. ³Eirao abe nininya tuchi que ra. Eiraoshĩ nininya tuchi que ee ra. ⁴Mbia nyeremo ngue ngaẽ ibate si ra. Ñee ñee ngue ecuaẽ Jesús nininya rese ra. Moisés que ùquĩ nda. Elías rese. ⁵Pedro que ñee Jesús je ra. —Sererecua, nandecu turãte a. Sucha ñetẽ uresaã saã na. Enongue nembraerã. Enongue Moisés mbaerã. Enongue Elías mbaerã no, i rei que Pedro ñee Jesús je ra. ⁶Echimbaaquiatsu siquichete quiatsu ngue re. Nyebe Pedro riqui nguiã “mañi nda aba re” ite. ⁷Ibeishĩ ngue tu nguichi eite re cote ra. Moisés mbuchecuayã ee. Elías abe no. Echeẽ mo ngue echandu ibeishĩ qui re ra. —Co rei sebi tuchi seriirĩ co. Echeẽ jeñandu bei quia, i que Dios ñee ee ibeishĩ qui re ra. ⁸Echimbaaquiatsu mae mose que Jesús miĩ ndiqui ee cote ra. Moisés que nyecuayã asi ee ra. Elías abe.

⁹Ecuã mose nguichi sita ibate si que Jesús ñee ee ra. —Ae rese jemae namo nae, ùquĩ je jenyecuachõ jẽ. Sequera si mose quiatsu teñee ñee mbia

je cote. Semano nonde eã, i que Jesús ñee uchimbaaquiātu je ra. ¹⁰Nyebe ñee eã nguiã emo je. —¿Mbaerã eriqui “se quera si mose” i re? i que ndua ndua ñee nyue ra. ¹¹Ñee ngue Jesús je cote ra. —¿Mbaerã embesasa ñee nde? “Elías rane nda tu Cristo si” i re, i que ñee Jesús je ra. ¹²Jesús que ñee ee ra. —Ae bei. Coche Elías rane tu nguiã mbae mbitirō ja. ¿Mbae i chō embesa ji quia Cristo riñ ña? “Mbae rasi ra esaã tuchi”, i chō nguiã. “Mbia ra eucuyã tuchi”, i chō nguiã no. ¹³Elías que tu no. Mbia icuã icuã tuchi que ee ra. Sã embesa ji ñee nyii no. Eĩ si tuchi que ra, i que Jesús ñee ee ra.

Jesús aba checuayã jea mbia riirĩ mo si

¹⁴Ngasẽ ngue echoi echimbaaquiātu ataque je cote ra. Mbia tubiriã tuchi que chĩ echimbaaquiātu mama huee ra. I que embesasa u ñee icuã icuã echimbaaquiātu je huee ra. ¹⁵Jesús ngasẽ mose que mbia nyuruirā tuchi mae erese ra. Oo tuchi que erese ra. ¹⁶—¿Mbae riñ jẽngo ñee icuã icuãte jenyue re? i que Jesús ñee mbia je ra. ¹⁷Emo ngue ñee Jesús je ra. —Sererecua, seriirĩ aru quia ndeje co. Nde embucherō sacuã. Aba checuayã icuã equereco uchiangui re co. Nyebe eriqui nguiã ñee eãte co. ¹⁸Aba checuayã icuã ndiqui seriirĩ isi isi beite co. Mbucoĩ coi beite equia íbii co. Echuru abe mbichoite. Ureĩ abe qiti quitite. Nyebe equirãcuã neate riqui nguiã co. “Aba checuayã jẽjea seriirĩ si”, ae rei que ndechimbaaquiātu je ra. Eaquiātuãte chō ngue ra, i que eru ñee Jesús j e ra. ¹⁹Jesús que ñee cote ra. —¿Mañĩ jenyẽ quia seicuyãte re? ¿Ñimbirãcuã mbeite ra aba quia jẽje re? i que Jesús ra. —Eriirĩ jendu rã seje, i que cote ra. ²⁰Eriirĩ ngue ecurucuaẽ ee cote ra. Aba checuayã ngue eriirĩ mburirite Jesús rese mae mose ra. Mbucoĩ que íbii ra. Mbuchiishao shao tuchi que ra. Echuru mbichoĩ tuchi que ra. ²¹—¿Manosete aba checuayã ndiqui ererequia re? i que Jesús eru je ra. —Eñetẽ mosebe bei, i que eru ra. ²²—Tátaa eriqui emondo mondo beite co. Ama ye abe. Erii-charã. Nde ejea aquiātu mose, ejea rã esi ure je, i que eru ñee Jesús je ra. ²³Jesús que ñee ee ra. —¿Mbaerã ereico “nde aquiātu mose” i seje re? Ae seicua quia nae, ũquĩ je aico mbae raã aquiātu jate co resẽ, i que Jesús ee ra. ²⁴Eru que ñee ee ra. —Areicuate se resẽ. Semingo uquiabe jiri nderese ae, i que eru ucheẽ mumbebote ñee Jesús je ra. ²⁵I que mbia cuaẽ nguia ñumunua nua tuchi huee ra. Nyebe Jesús ñee asi nguiã aba checuayã icuã je. —Aba checuayã, mbia isa erembũtaote quia hue. Erembucheẽ ngũiaate abe equia hue. Esẽ oso esi. Eriique sichĩ nda oso echiangui re jẽ, i que Jesús ee ra. ²⁶Aba checuayã ngue tasẽte eriirĩ mburiri cote ra. Usẽ oso cote. Eraaque rã ngue eriirĩ nyi cote ra. Mano nei nguiã mbia je. ²⁷Jesús que emua eo rese ra. Juã turã ngue cote ra. ²⁸Jesús que oso ique tuchúaa cote ra. Echimbaaquiātu que ñee ee mbia tiãmbaa cote ra. —¿Mbaerã aba checuayã useã oso urecheẽ mose ure re?

i que ñee ee ra. ²⁹Jesús que ñee ee ra. —Jeñee eã mose Dios je, ã jēja aroneate. Jēhui eã mose jenyiu si, ã jēja aroneate no, i que Jesús ee ra.

Mbia ra seiquia, i si Jesús

³⁰Galilea rĩ ngue echoi hue si ra. —Sã mbia jiranua nanderese, nandeso mose hue rĩ, i que Jesús ñee uchimbaaquiatu je ra. ³¹Uchimbaaquiatu ae que embaaquiatu quiatu oso quia ñeenda rui ra. —Emo nda semee mbia icuã je seiquia sacuã. Seiquia ji ra aquera si tres días mose, i que equia embaaquiatu quiatu ñeenda rui ra. ³²Echimbaaquiatu que echeẽ icuayãte quia ra. —Ndecheẽ embiasa asa tuchi rã ure je, i ãte que equia ee ra. Ireĩ ireĩte quiatu que equia esi ra.

Ererecua tuchi ra se, i jaaja Jesús chimbaaquiatu nyue

³³Ngasẽ ngue Capernaum nda. Tuchúaa ique mose que ñee uchimbaaquiatu je ra. —¿Mbae riĩ jenyu quia ñee icuã icuãte jenyue ñeenda rui re? i que ee ra. ³⁴Quiriri ja chõ ngue u ñee ndocoĩ ee ra. —Ererecuarã nda se cote, i jaaja chõ equia nyue ñeenda rui reaẽ. Nyebe eriqui ireĩ ireĩte Jesús si re. ³⁵Jesús que ngoi cote ra. —Jenyu ja rã. Tacheẽ jē ja je, i que uchimbaaquiatu doce je ra. —“Ererecuarã se” i mose emo, sã uataque rimbarã ño eriqui, i que Jesús ee ra. ³⁶Ñquẽ mo ngue emiĩ eite re cote ra. Sui que ñee uchimbaaquiatu je ra. ³⁷—Ae siqui turã nguia mbi a riirĩ je seriĩ nae, seje abe chõ eriqui nguia siqui turã. Ae eturã ndiqui seje nae, semondosa abe je chõ eturã ndiqui nguia, i que Jesús ee ra.

Emo icuã eã mose nande je, nanderesenda chõ ũquĩ nde

³⁸Juan ngue ñee Jesús je ra. —Pe emo nyi aba checuayã ndirõ ndirõ mbia si nderiĩ pe. Uremae ngue erese ra. Aque eriqui ãte nanderese aque. Nyebe uresiquisã nguia, i que Juan Jesús je ra. ³⁹Jesús que ñee ee ra. —Tei. ¡Jēsiquisã quisãchĩ nda jē! Emo mbia mae sayã naa mose seriĩ, ñee icuã eã nda seje aquere. ⁴⁰Emo icuã eã mose nande je, nanderesenda chõ ũquĩ nde. ⁴¹Emo sechimbaaquiatu isei mbiu turã mose seriĩ, Dios abe ra mbae turã mondo aque je.

Mbae icuã nda nadesaã uquiachĩ emo je

⁴²Ae ra mbae icuã saã uquia seicuasa mo je nae, ũquĩ nda mbae rasi saã tuchi cote. Ũquĩ nda aba mombo chõ ama ndisha ye nyii re chã. Sita resebe ecua ji mondo. Ĩ nda mbae icuã naa uquia eãte rei seicuasa je. ⁴³Ndeo nemingo mose mbae icuã ndese, ndeo echisia mombo. Coche rei ra ereso ibate ndeo miĩ Nderequia, siqui bei sacuã huee. Oso rocoĩ tata cuásuu, ndeo nyeremo nderao. Tata mungue aronea tuchi chõ hue jenda re. ⁴⁴Mbae rosei ra manoa mbei huee. Tata ra uqueã mbei huee no.

⁴⁵Ndei nemingo mose mbae icuã ndese, ndei echisia mombo. Coche rei ra ereso ibate ndei miñ nderequia, siqui bei sacuã huee. Nemombo rocoñ tata cuásuu, ndei nyeremo nderao. Tata mungue aronea tuchi chõ hue jenda re. ⁴⁶Mbae rosei ra manoa mbei huee. Tata ra uqueã mbei huee no. ⁴⁷Nderesa nemingo mose mbae icuã ndese, nderesa echoo. Coche rei ra ereso Dios recua nderesa miñ nderequia. Nemombo rocoñ tata cuásuu, nderesa nyeremo nderao. ⁴⁸Mbae rosei ra manoa mbei huee. Tata ra uqueã mbei huee no. ⁴⁹Tata ra mbia sei bei huee. ⁵⁰Embiquesa rã ño jëingo nguiã mbia je ã. Sã embiquesa turãte no. Eise quiachamba mose, eicuã tuchi ra cote. Embiquesa rã tuchi chõ jëingo mbia je. Jëingo turã ño nguia jenyiese, ì que Jesús ee ra.

Jesús ñee mbia ngüinisi mombo je rii

10 ¹Jesús que ngata si oso cote ra. Judéaa que esi ra. Ama Jordán ndobei que esi sobei cote ra. Mbia que ñumunua nua tuchi quia ee ra. Mbaaquiato quiato que equia ra. Sã eriqui mbia mbaaquiato quiato beite no. ²Fariseos mo abe que ngaë erea ra. —Tã nande Jesús je no. Ma ñee Dios cheë abi, ì que ñee nyue ra. —¿Coche mbia ngüinisi jea ubiã mose re? ì que ñee Jesús je cote ra. ³—¿Mbae ì Moisés embesa re? ì que Jesús ee ra. ⁴Fariseos que ñee ee ra. —“Jeninisi jea nonde, papel mbesa ji jemondo ee”, ì que Moisés ra, ì que ra. ⁵Jesús que ñee ee ra. —Jeãquĩ ãtãte quiato ngue re. Nyebe Moisés ùquĩ mbesa nguiã jëje. ⁶Ûquĩ ì áte que Dios quia mbia ao ramo mose nyii ra. Dios mbia ao mose, nyeremo ngue echao ra. Erãcuë ngue echao ra. Eninisirã abe que echao no nda. ⁷Nyebe ra emo ndiqui ngüinisi rese bei. Ngu si isho. Usi si abe no. Ngüinisi miñ ndese siqui bei sacuã. ⁸Co miñ na siqui sacuã nyiese cote. Nyeremo siqui rã eã ño cote re. Co miñ siqui rã ño ùquĩ cote re. ⁹Ae Dios mbucha nyiese nae, sã ùquĩ hui eã mbei nyesi, ì que Jesús ñee fariseos je ra.

¹⁰Ngasë mose tuchúaa que echimbaaquiato ñeembe ee ra. —Ndecheë embiasa turã na ure je, ì que ee ra. ¹¹Jesús que ñee ee ra. —Ae ngüinisi jea nae, emo ndese siqui sacuã nae, eicuã tuchi chõ ùquĩ nde. Adulterio ì que ùquĩ je ra. ¹²Cuñã mo ngu jea mose siqui sacuã emo ndese, eicuã tuchi chõ ùquĩ no nde, ì que Jesús ee ra.

Jesús mbia riiñi isi turã turã

¹³Mbia que nguiirĩ ngurucuaë cuaë nguia Jesús je ra. Jesús oco oco sacua ere. —¿Mbaerã jendiirĩ jendu quia co re? ì rei que echimbaaquiato ñee mbia je ra. ¹⁴Jesús que paama ì ñee uchimbaaquiato je ra. —Jeñeechĩ nguiã ee. Sã ae ae riqui nguiirĩ ndurucuaë cuaë seje. Eĩ ño Dios rimba nguiã. Ucuasu raã naa eã. Mbia riiñi na. ¹⁵Mbia riiñi na ño jëingo Dios isi turã. Ì mose ra Dios rimba tuchi jë cote, ì que Jesús ra. ¹⁶Mbia riiñi ngue esui sui ra. O que echono ñono earõ nda. Ñee turã ngue Dios je erii nda.

Acuanindu mbaecha mo ñee Jesús je

¹⁷Acuanindu mo ngue tu Jesús je ra. —Mbia mbaaquiatusa turâte nde. ¿Mbae turã mo nda asaã Dios je semingo bei sacuaã nde? i que ñee Jesús je ra. ¹⁸Jesús que ñee ee ra. —¿Mbaerã ereico “eturã” i seje re? Dios mii ño eturã ndesẽ. ¹⁹Dios cheẽ emumbayã. Echeẽ ereicuate quia co resẽ: “Emo ninisi rese ra ereicochĩ. Mbia ra ereiquiachĩ. Mbae ra erembuquiachãchĩ. Erecheẽ ñoñoñochĩ nda emo nii. Emo nda erembiirĩ irĩchĩ. Ndeturã ño nderu je. Ndesi abe je”, i que Dios cheẽ nda, i que Jesús ñee ee ra. ²⁰Acuanindu que ñee ndei ee ra. —Ūquĩ ngue amumbayã ja bei quia ra. Señetẽ mosenda bei, i rei que ñee Jesús je ra. ²¹Jesús que nyesequa tuchi mae mose erese ra. —Ã mii mo abe eresaã eãte. Nembae emondo mondo ja mbia mbaecha reã je. Nde ũquĩ naa mose, mbae tubiriã nda nembae ndeico mose ibate. Nembae mondo ja mose mbaecha reã je, serui eico cote, i que Jesús ee ra. ²²Acuanindu Jesús cheẽ andu mose que echiã ndoso tuchi cote ra. Eya eã tuchi que oso Jesús recha ra. Mbaecha tuchite quiatu ngue ae re.

²³Jesús que mae mbia rese ra. —Mbaranguiatu ãte mbaecha je ngasẽ sacuaã ibate, siqui bei sacuaã huee, i que ñee uchimbaaquiatu je ra. ²⁴Echimbaaquiatu que nyuruira tuchi eandu ra. Jesús que ñeembe ee ra. —Ae ndua ndua beite quia umbae tubiriã ndese, mbaranguiatu ãte ũquĩ je oso sacuaã ibate Dios rese. ²⁵Sã ticuasú mo ndiqui oso aroneate ique aguja sorei rĩ no. Eĩ si chõ mbaecha no nde. Oso aronea ibate Dios rese, i que Jesús ee ra. ²⁶Echimbaaquiatu que nyuruira tuchibe u eandu no nda. —¿Aba quiatu ra oso Dios rea ibate re no? i que ñee nyue ra. ²⁷Jesús que mae erese ñee ee ra. —Ae mbia saã aroneate quia nae, Dios mii ño nda esaã, i que Jesús ee ra. ²⁸Pedro que ñee Jesús je ra. —Ure que urembae uresecha ja ra. Siqui sacuaã nderui, i que Pedro ñee nda. ²⁹Jesús que ñee ee ra. —Tacheẽ nyecua jẽje. Emo umbae secha ja mose siqui sacuaã serui, embae ra asibishorõ tuchi ee cote. Ae uchuchua secha. Ae ngõngue secha. Ae ngu secha. Ae usi secha. Ae nguiirĩ secha. Ae umbae ibi secha no. ³⁰Ūquĩ mbae ja ra asibishorõ tuchi cien veces ereco mose íbii. Echuchua ata. Enongue ata. Esi ata. Eriirĩ ata. Ibi ata abe no. Ūquĩ ja ra asibishorõ tuchi ee. Mbia icuã icuã tuchi ra ee seriĩ. Aquere ra siqui bei tuchi Dios rese ibate cote. ³¹Ae ererecua saã saã nguia namo nae, ererecua eã tuchi ra ũquĩ m o cote. Ae ererecua eã namo nae, ũquĩ mo nda ererecua cote, i que Jesús ra.

Mbia ra seiquia, i si Jesús

³²Jerusalén ngue echoi quia ra. Jesús que oso quia enonde ra. Echimbaaquiatu que siquichete nyoĩ quia ra. Nyebe Jesús ererao nguia mbia tiãsa ñee sacuaã ee. ³³—Co nyao quia Jerusalén co. Huee ra mbia

semee sacerdotes rerecua je. Embesasa abe je. “Jesús jëiquia”, i ra seriĩ. Seme e nda judíos eã je cote. Sei quia sacuaã. ³⁴Mbia ra secheẽ saã saã. Seiruã nua abe ra eno. Sembucha chee ra i quia ira rese. Tres nyaashĩ mose ra aquera si, i que Jesús ñee ee ra.

Ererecuarã se, i raque Jacobo, Juan ndese

³⁵Jacobo que oso Jesús riichã ngõngue rese ra. Juan, i equia ee. Zebedeo riiriĩ ndei ùquĩ. —Urechu ñee ndeje aa, Urembaaquiatusa. Ae riĩ nda urecheẽ ndeje nae, ùquĩ je “eno” ere rã ure je, i rei que ee ra. ³⁶—¿Mbae ra aba saã jëje re? i que Jesús ee ra. ³⁷—Ndeico mose ererecua tuchi, sã ure abe ureico ererecuarã nderese. Sã urecoi ja u ndejii. Co miĩ chĩ ndequiato cuti. Enonge chĩ ndequiato cutiã no, i rei que ñee Jesús je ra. ³⁸Jesús que ñee ee ra. —Ae riĩ jëingo ñee seje nae, jëirandu turã eãte ùquĩ ndese. Ae rasi ra asaã tuchi nae, ¿ùquĩ ndasi ra jësaã jë abe re? Bautizar i ra seje, ¿eĩ nda bautizar i jë abe je re? i que Jesús ee ra. ³⁹“Ae” i que ñee ee ra. Jesús que ñee ee cote ra. —Ae bei. Ae rasi ra asaã tuchi nae, ùquĩ ndasi ra jësaã tuchi rei jë abe. Bautizar i ra seje, eĩ si rei ra bautizar i jëje no. ⁴⁰“Ererecuarã ure”, jenyere rei que seje, ùquĩ asaã aroneate se jëje. Paba ae quiatu ra ùquĩ saã. A e ebite, ùquĩ nda emiĩ ererecuarã, i que Jesús ra. ⁴¹Echĩmbaaquiato ataque que jirandu erese ra. Echĩmbaaquiato diez. Paama i que Jacobo je ra. Juan je abe. ⁴²Jesús que “jenyu” i ñee uchĩmbaaquiato ja je cote ra. —Mbia ataque rerecua riqui ucuasu raã naa tuchi ngũimba je ùquĩ. ⁴³Ùquĩ nda jësaã eã jë. “Ererecua ra se”, i mose jemo, sã ùquĩ siquichõ uataque rimbarã. ⁴⁴Jemo “se rane jë” i mose, sã ùquĩ ndiqui bei mbae turã naa naa uataque je no. ⁴⁵“Sã mbia mbae turã naa naa seje”, ae eã ngue u ra. “Se quiatu mbae turã tasaã saã oso mbia je”, ae u nguiã. Co achu quia mano mbia tubiriã ndiquicharõ sacuaã co, i que Jesús ñee nda.

Jesús Bartimeo ndesayã mbucherõ

⁴⁶Jesús que ngasẽ Jericoo ra. Uchĩmbaaquiato rese. Jesús ngata mose hue si, mbia tubiriãte que nyoĩ quia erui ra. Eresayã mo ngue chĩ ñeenda jie huee ra. Ache ache i que huĩ nda. Bartimeo, i equia ee. Timeo ndiiriĩ ngue ae ra. ⁴⁷Jirandu mose Jesús rese que ñeemombo mombo ee ra. —iJesús! iDavid nducucha! iNdeya eã ño serese jë! i que ee ra. ⁴⁸—iEquiriri chõ jë! i tuchi rei que mbia ñee ee ra. —iSererecua! iDavid nducucha! iNdeya eã ño serese jë! ibe que eresayã ñee Jesús je ra. ⁴⁹Jesús que tiba ra. —Eresayã jendu rã, i que ra. Mbia que ñee eresayã je ra. —Ndeya chõ jë. Ehuã. Jesús riqui ñee ndeje a, i que ee ra. ⁵⁰Juã asi que oso oo Jesús rese ra. Uchiatiquia recha. ⁵¹—¿Mañi ae ra ndeje re? i que Jesús ñee ee ra. —Seresa embuturã na, Sererecua, i que ra. ⁵²Jesús que ñee ee ra. —Eso cote. Seicuate que se ra. Nyebe nderesa nyerõ nguiã cote, i que

ee ra. Aque mose tuchi que eresayã ndesa turã ja cote ra. Jesús rui que esi quia cote ra.

Jesús ngasē Jerusalén

11 ¹Jesús que Jerusalén curubite nyoï quia ra. Betfagé, i que hue sucha je ra. Ibi ibate mo abe que chĩ huee ra. Monte de los Olivos, i que ee ra. Hue si que Jesús uchimbaaquiatu nyeremo mo mondo ra. ²Ñee ngue ee ra. —Achi sucha chõ jëso rã. Jengasē namo mose ra burro riirĩ cuasa mo ñi jëje huee. Emo ngue nyui eãte eátoo ra. Jenyura seru seje. ³Emo ñee mose jëje, “¿mbaerã nda jenyura re?” i mose jëje, jënee ee. “Nandererecua que ‘jendu’ i ra. Mondo jeibe ra jëje”, jenye ee, i que Jesús ñee ũquĩ nyeremo mondo ra. ⁴Nyoï que erea cote ra. Burro riirĩ ngue etea Jesús cheẽ nguire cote ra. Ecuasa que chĩ taicuee eiquesa jii ra. Nyura que cote ra. ⁵Ae mbia chi huee nae, ũquĩ mo ngue ñee ee ra. —¿Mbae rese jëingo hue re? ¿Mbaerã jëingo era era re? i que ee ra. ⁶Jesús cheẽ ndui si que ũquĩ ñee ee ra. “Eno” i que mbia ee cote ra. ⁷Burro riirĩ ngue ecuruchoi Jesús je cote ra. Huiirao que echono ñono earõ nda. Jesús que nyui eátoo cote ra. ⁸Jesús que ngata oso quia burro átoo cote ra. Mbia tubiriã ngue huiirao mbiitee tee nyoï quia ibi rĩ enonde ra. Emo ngue síndo mbiitee tee choi quia enonde no nda. Jesús oso sacua hue rĩ. ⁹Mbia ia tuchi que tasē tasē nyoï quia enonde ra. Eruï abe no. —Co nandererecua ru quia ngasēte co. Co Dios chimbu ru quia ngasēte nande je co. ¹⁰David nducucha ru quia co. Nandererecua turã sacua. Dios turã tuchi riqui nande je co, i tuchi que mbia quia ñee nda. ¹¹Jesús que ngasē Jerusalén cote ra. I que que oso Dios chuchua cote ra. Mae ja mose mbae rese que esi Betania uchimbaaquiatu rese cote ra. Tenda quiatu ngue osote nguã ee.

Jesús ñee icuã higo i je

¹²I que Jesús choi quia Betania si isamami nda. Eriãcuãte que oso quia ra. ¹³Isho que mae higo i mo ndese ra. Ero rerecua que ra. —Ea mo tau, i rei que oso erea ra. Ero achõte chõ ngue ee ra. Aque mose que eriqui ia eã nda. ¹⁴Jesús que ñee higo i je cote ra. —Mbia ra ndea u eã mbei cote, i que ee ra. Echimbaaquiatu abe que echeẽ ñandu ra.

Jesús mbia mbusē Dios chuchua si

¹⁵Ngasē ngue Jerusalén cote ra. Jesús que oso Dios chuchúaa ra. Huee que mbia riqui mbae isi isi bei ra. Mbae mondo mondo abe mbae isiquia ribishorõ. ũquĩ ja que Jesús mbusē mondo ra. Ae mbae isiquia sibishorõ shorõ nguia, ũquĩ mbae abe que embuchiichere chere ja mesa ra. Mbae ja resebe. Ae nyurushi cuasu mondo mondo mbia je mbae ribishorõ nae, ũquĩ nenda abe que embuchiichere chere ja ra. ¹⁶Jesús que ñee ũquĩ je ra. —Dios chuchua

ite rĩ jẽingochĩ nguiã mbae rerao rao. ¹⁷“Mbia cheẽsa Dios je’, i ra mbia Dios chuchua je”, i rei que embesa ji huĩ nda. Jẽ nguia jẽicua tuchite Dios chuchua je re. Mbae mbuquiachãsa chuchua jẽsaãte chĩ nguiã ee, i que Jesús ñee asite ùquĩ je ra. ¹⁸Sacerdote rerecua que chĩ Jesús cheẽ andu ra. Embesasa abe no. —¿Mañĩ nda aba Jesús iquia re? i que eu ndua ndua ra. Mbia quiatu que oote Jesús cheẽ ndese ee ra. Nyebe eriqui nguiã Jesús ucuayãte. ¹⁹Hue sucha qu e Jesús secha oso eresaitõ cote ra.

Higo i mano cote

²⁰I que Jesús nyoi quia isamamĩ nda. Higo i cutite que echoi quia ra. Higo i ñimama ño nguia reaẽ. Erao abe mano ño nguia re no aẽ. ²¹Pedro que ndua ñee Jesús je ra. i—Sã Sererecua! Higo i je que erecheẽ asi nae, mano ño equia cote reaẽ, i que ñee Jesús je ra. ²²Jesús que ñee ee ra. —Dios jẽicua tuchi. ²³Tacheẽ nyecua jẽje. Jemo ñee mose sita ibate mo je, “esiri rã oso ama ndisha ye” i mose sita ibate mo je, sã Dios icua tuchi rã nyii. “Dios ra secheẽ mumbayã” i tuchi mose uchiangui re, Dios ra echeẽ mumbayã. Sita ra siri ee. ²⁴“A emondo seje”, jenye mose Dios je, mondo ra jẽje. “Dios ra emondo seje”, jenye mose jeñiangui re, mondo ra jẽje. ²⁵Emo mbae icuã naa mose jẽje, ùquĩ ñee chĩ mose jendese, jẽtesarei chõ ùquĩ si. Jẽtesarei chõ esi ñee nonde Dios je. Ùquĩ mose ra jendu ibatenda abe jẽicua mbutiã no. ²⁶Jẽtesareiã mose emo icuã si, Dios abe ra jẽicua mbutiã eã mbei jẽsi, i que Jesús ee ra.

¿Aba nembu re? i mbia ñee Jesús je

²⁷Nyebibe que echoi Jerusalén nda. Dios chuchuaqui rĩ ngue Jesús riqui ngata ra. Sacerdote rerecua que nyoi ñee ee ra. Embesasa rese. Amei ndese. ²⁸—¿Mbaerã ereico mbia mbaaquiatu quiatu Dios chuchúaa re? ¿Aba “ùquĩ esaã saã” i quia ndeje re? i que ùquĩ ererecua ñee ja Jesús je ra. ²⁹Jesús que ñee ee ra. —Se rane tacheẽ jẽje. Se rane preguntar tae jẽje. Secheẽ jẽsibishorõ na nyii. Aquere quiatu ra jeñee asibishorõ cote. ³⁰¿Aba ñee Juan je re? “Eso bautizar i mbia je” i ee re. ¿Dios eã ño ere? Jeñee seje, i que Jesús ee ra. ³¹Ererecua que ndua ndua ja u cote ra. Ñee ñee ngue u nyue ra. —¿Mañĩ nande ra echeẽ ndibishorõ nde? “Dios que Juan mbu ra”, nande aroneate ee. Nyebe ra ñee nande je. “¿Mbaerã jẽingo eãte erui re no?” i quiarei ra nande je. ³²“Dios que embu eã nda”, nande aroneate ee no. Mbia ataque ra paama i tuchi nande je. Juan quiatote quia mbia re, i que ererecua ñee ñee nyue ra. ³³Ñee nyee que Jesús je cote ra. —Ureicuayãte. Aba chõ Juan mbu bautizar i sacua mbia je, i que ee ra. Nyebe Jesús ñee nguiã ee. —Se abe quiatu tacheẽ eã jẽje no. Ae “ã esaã” i seje nae, eriĩ nda acheẽ eã jẽje no, i que Jesús ùquĩ ererecua je ra.

Uva raarõsa icuã icuã nguerecua je

12 ¹Jesús que ejemplos saã saã mbia je ra. —Sã mbia ibicha mo ndiqui no. Sã eriqui uva i tiquia tiquia no. Sã etarõ no. Uva

rique rirurã abe que echao ra. Sucha ibate mo abe que echao no nda. Uco raarõ turã ja sacuã. Ibicha que “sembae uvas jësaarõ” i emo je cote ra. Al partido. Ae que oso isho itôte cote ra. ²Uva quiche mose que ngũimba mo mondo rei umbaerã ndea ra. ³Uva raarõsa que erimba mbucuasẽ icuã ño nda. Iruã nua ño ngue ra. Eochi chõ ngue emondo mbuchebi ra. ⁴Echa que ngũimba mo mondobe rei ereabe no nda. Aque abe que embucuasẽ icuã no nda. Sita que emombo mombo erese no nda. Eãquĩ nduqui tuchi que ra. ⁵Ngũimba mo ngue emondobe aquere no nda. Aque quiatu que eiquia tuchi cot e ra. Eĩ eĩ mbei que eraarõsa quia echa rimba je ra. Emo emo ngue eiruã nua nda. Emo emo ngue eiquia no nda. ⁶Aque miĩ tuchi que siquichõ echa rese cote ra. Eriirĩ tuchi chõ ngue aque re. Nyesecua tuchi que equia aque rese ra. Aque que emondo chee uva rea cote ra. “Ireĩ ireĩ jiri ra seriirĩ si”, i rei que ra. ⁷Eriirĩ ngasẽ mose que uva raarõsa ñee nyue ra. —iCo eriirĩ ndu quia co cote jẽ! iNandeiquia rei jẽ! Ñ nda uvas nandembaerã ae tuchi cote, i que ñee nyue ra. ⁸Eraarõsa que eriirĩ isi icuã cote ra. Curuchoi que iquia pe jiri ra. Mano ngue cote ra. ⁹¿Mañi nda echa quia eraarõsa je cote re? Echa ra eraarõsa icuã iquia ja cote. Uva i ra emondo ja emo je eraarõ sacuã cote. ¹⁰¿Ã mbesa ji rese jemae ate re?

Sã emo ndiqui tuchia ao sita je no.

Sita mo ngue equirirõ mombo ra.

Eicuãte eriqui reĩ nguiã ee.

Aquere ndua si erese.

“Earonda sacuã turambi chõ eriqui re”, i ndua si uchimombo rese.

Uchimombo que esirõ si cote ra.

¹¹Dios chiao chõ ùquĩ nde.

Dios chiao turã tuchi riqui nande je ã,

i ñi embesa ji re, i que Jesús ee ra.

¹²—Nanderiĩ ño eriqui nguiã ñee, i que ùquĩ ererecua ra. —Nandeisi rei serao jẽ, i rei que nyue ra. Jesús isi aronea tuchi que mbia résaa ra. Eireĩte quiatu ngue mbia tubiriã si re.

¿Impuestos ra uremee ererecua je re? i mbia ñee Jesús je

¹³Ūquĩ ererecua que fariseos mo mondochoi ñee Jesús je ra. Herodes chimbaaquiato abe mondochoi era. —Jesús nandembucheẽ icuã na. Ñ nda mbia paama i ee, i rei que ra. ¹⁴Uturã ngue esaã ñooño Jesús je ra. — Jesús, co ereico mbia mbaaquiato turãte co. Mbia jaje ndeturãte riqui co. Co ereico turãte mbia mbuchiabiã co. Mbia erembaaquiato quiato turãte quia Dios icha riĩ co. Nyebe urechu nguiã ñee ndeje a. ¿Coche mbia mbae isiquia mee mee Romanos nderecua je re? Impuestos. ¹⁵¿Uremee mee nda ee re? ¿Uremee eã nda ee re no? i que ñee Jesús je ra. Jesús que ùquĩ icuã icuate ra. Nyebe ñee nguiã ee. —¿Mbaerã jëingo “Ñ nda Jesús ucheẽ

nyabi”, i serĩi nde? Mbae isiquia jēteacuquia imbu seje. Tamae erese, i que ee ra. ¹⁶Mbia que eteacuquia ee ra. —¿Aba mbae nombre ñi mbae isiquia rese a re? ¿Aba aqũ aingue abe ñi a re? i que Jesús ee ra. Romanos nderecua, i que mbia ee ra. ¹⁷Jesús que ñee ee cote ra. —Romano s nderecua mbaerã jemondo chõ ee. Dios mbaerã jemondo chõ ee no, i que Jesús ee ra. Mbia que nyuruirã jate u Jesús cheẽ andu ra.

Mbia raaque ra quera si, i Jesús

¹⁸—Mbia raaque ra quera eã mbei, i que mbiamo nguia ñee nda. Saduceos i que ũquĩ mbia je ra. Ũquĩ mo ngue nyoĩ ñee Jesús je ra. Tã i sacua ee. ¹⁹—Sererecua, ã ngue Moisés mbesa nande je ra: “Emo ndiiriã mano mose, sã enongue mano je ninisi rerequia erendaque re. Sã tiiri ngõngue raaque riĩ”, i que Moisés embesa nande je ra. ²⁰Eriqui mo ngue siqui urerese ra. Seis que eribi ra. Eriqui que ngüinisiã quereco rei ra. Mano ño ngue tiiri ndocoĩ ngüinisi recha ra. ²¹Enongue que nguiqui checha quereco rei cote ra. Ae abe que mano ño tiiri ndocoĩ no nda. Enongue que equereco no nda. ²²Ũquĩ seis que ngõngue checha quereco ja rei ra. Mano ja chõ ngue erecha tiiri ndocoĩ no nda. Eninisi eru checha que mano nyee chõ cote no nda. ²³Siete rei que eru nyii ra. Mbia raaque quera si ja mose, ¿abate ra equereco cote re? i que saduceos ñee Jesús je ra. —Ma Jesús ñee icuã, i chõ ngue re.

²⁴Jesús que ñee ee ra. —Jëingo Dios cheẽ icuayãte ã. Jëingo Dios cheẽ abi tuchi ã. Jëingo Dios quirãcuã icuayãte ã. ²⁵Ae raaque ra Dios mbuquera si nae, ũquĩ nda ngüinisi quereco eã mbei huee cote. Ũquĩ nda ngu quereco eã mbei huee cote no. Angeles rã mbei ra mbia riqui huee ibate cote. ²⁶¿Moisés chimbresa rese jemaẽ ãte re? Mbia raaque quera si riĩ ño ngue embesa nguia. Ira ruri sendi quia, aque mose que Dios Moisés mbiirandu ũquĩ ndese ra. “Abraham nderecua chõ aico nguia se co. Isaac nderecua abe. Jacob nderecua abe no”, i que Dios Moisés je aque mose ra. ²⁷¿Ngue mano ndei nyii ra. Eresco siqui bei chõ nguia namo ã. Mbia raaque rerecua eã ño Dios re. Mbia reco rerecua chõ ae re. ¿Ũquĩ jëicua eãte quia ã nde? i que Jesús ñee mbia je ra.

Echesequa tuchi quia Dios rese

²⁸Embesasa mo ngue chĩ echeẽ andu ra. —Jesús ñee turã tuchichĩ saduceos je, i que uchiangui re ra. Nyebe esi nguia ñee ee. —Jesús, Dios cheẽ tubiriãte riqui ã ndesẽ. Mbia echeẽ mumbayã sacua. ¿Ma Dios cheẽ ndiita tuchi ma nde? i que embesasa ñee Jesús je ra. ²⁹Jesús que ñee ee ra. —¿Ño Dios cheẽ ndiita ã nde: “Secheẽ jeñandu rã, Israelitas. Dios miĩ tuchi chõ nandererecua re. ³⁰Echesequa tuchi quia Dios rese. Ndechĩã je. Neaĩ je. Nendua ndua abe je. Ndequirãcuã abe je”, i chõ Dios cheẽ ndiita nguia. ³¹¿Abe rei ũquĩ nduinda ã no: “Sã ereico nyesequa ndechiese

no. Eĩ ere si chõ nyesequa mbia rese”, i. Ûquĩ nyeremo ndei Dios cheẽ i tuchi ùquĩ, i que Jesús ee ra. ³²Embesasa que ñee Jesús je cote ra. —Ae bei, Sererequa. Dios miĩ tuchi chõ nandererequa re. Emo abe mo eãte. ³³Nandechesequa tuchi mose Dios rese, ùquĩ eturãte ee. Nandechesequa tuchi mose nandechiã je. Nandendua ndua je. Nandeaĩ je. Nandequirãcuã je abe no. Nandechesequa tuchi mose mbia rese, ùquĩ eturãte Dios je mbae mo si. Sacrificio mo si. Ofrenda mo si, i que embesasa ñee Jesús je ra. ³⁴—Ñee aquiature equia seje co, i que Jesús uchiangui re ra. —Dio s rimbarã tuchi chee ra nde, i que ee cote ra.

¿Aba rucucha Cristo re?

³⁵Jesús que mbia mbaaquiato quiato quia Dios chuchúaa ra. —¿Mbaerã embesasa riqui ñee nde? “David rucucha chõ Cristo re” i re. ³⁶David abe que “sererequa” i Jesús je ra. Sã embesa ji ñee no:

Dios que ñee Cristo sererequa je ra:

“Ecoi seji. Nde abe ra ererequa serese.

Ae ndeucuayãte quia nae, ùquĩ je ra ndequirãcuã atecuquia tuchi.

Ndequirãcuã tuchi chee ra ùquĩ si”, i que Dios ñee sererequa je ra, i que Espíritu Turã David mbucheẽ nda. ³⁷David sí chõ “sererequa” i nguiã Cristo je. Cristo David rucucha mose, ¿mbaerã David “sererequa” i ee re? i que Jesús embesasa je ra. Mbã tubiriã ngue Jesús cheẽ chandu turã jate ra.

Jesús ñee asi embesasa je

³⁸Jesús que uchimbaaquiato mbaaquiato quiato ra. —Embesasa rã nda jëingochĩ jë. Ûquĩ ucuasu saã saã mbeite quia ã. Huiirao turã equereco beite quia ã. “Sã mbia ererequa i nande je”, i beite equia ã. ³⁹Mbã renda turã abe eirabo rabo beite quia mbã si ã. “Fiestacha jii quia taĩ jë”, i abe beite equia ã no. ⁴⁰Ari eru cheecha mbã abe embutiã tiãte quia ã no. Ucheẽ oco abe esaã saã mbeite quia Dios je ã no. “Í nda mbã mae nanderese”, i chõ nguiã. Ûquĩ nda Dios mbasi tuchi cote, i que Jesús mbã je ra.

Eru cheecha mbaecha reã mo mbã mee Dios je

⁴¹Emo mose que Jesús ñi Dios chuchúaa ra. Ofrenda riru nonde que eñi ngoi ra. Mae ngue miĩ mbã mbã isiquia mondo mondo mose eriru ye rese ra. Mbaecha atate que mbã isiquia tubiriã mondo mondo quia eriru ye ra. ⁴²Eru cheecha mo ngue ngasẽ u cote ra. Nyeremoño tuchi que ae mbã isiquia mondo ra. Centavo miĩ mbuchecha tuchi que ra.

⁴³Jesús que ñee uchimbaaquiato je ra. —Jenyu. Tacheẽ nyecua jëje. Eru cheecha mbaecha reã ngue mbã isiquia mondo tuchi mbã ataque si ra.

⁴⁴Mbaecha quiato que umbã rire ñetẽ mondo mondo ra. Eru cheecha quiato que umbã miĩ mondo ja ra, i que Jesús ra.

Mbia ra Dios chuchua mbucoi ja, i Jesús

13 ¹Jesús que oso usē Dios chuchua si cote ra. Echimbaaquiatu mo ngue ñee ee ra. —Sã Dios chuchua turã tuchite jê. Eao ji turã tuchi sita je, i que echimbaaquiatu mo ñee ee ra. ²Jesús que ñee ee ra. —Ã ndese jêingo mae ã nae, ũquĩ nda mbia mbucoi ja cote. Sita mo nda chi eã nyuchuarõ Dios chuchua cote. Mbia ra Dios chuchua mbucoi ja tuchi cote, i que Jesús ñee nda.

Mbae ua ja nonde chõ ã nde

³Jesús que chĩ ngoi huee ibi ibate mo nda. Monte de los Olivos, i que hue je ra. Dios chuchua checuate que ee hue si ra. Echimbaaquiatu que ngasē ñee ee ra. Pedro. Jacobo. Juan. Andrés. Ũquĩ ja que ñee eísaa ra. ⁴—¿Manosete ra ũquĩ nde? ¿Mañi ure ra equia jirandu mbae ua nonde re? i que ñee Jesús je ra. ⁵Jesús que ñee ee ra. —Jêtesa jiri quia jê. Mbia mo nda jembiirĩ irichĩ ñee jêje jê. ⁶“Cristo chõ se re” i ra mbia ñee ata atate jêje. Ũquĩ nda jeñanduchi jê. Ũquĩ nda mbia mbiirĩ irĩ jate. Ñee ñooño je chõ ũquĩ nde. ⁷Mbia ra guerras saã saã tuchi. Mbia ra ñee ñee tuchi quia nyiiquia iquia je riĩ. Ũquĩ mose ra jêsiquichechĩ jê. Ũquĩ ja rane nda nyecua raque. Aque mose r a mbae ja ua eã ná. ⁸Mbia ra guerras saã tuchi chee. Nyiiquia iquia tuchi rae. Mbia riãcuã tuchi ra aque mose no. Emo ñooñoa tuchi ra mbia rasi. Mangué chooñoa tuchi ra ibi nyere nyere. Jembasi ramo mose chõ nda ũquĩ nde. Aquere ra jembasi tuchi cote.

⁹iSã jê! Mbia icuã icuãte ra jêje. Jembiirĩ irĩ ndae. Jemee mee icuã nda mbia rerecua je. Jêiruã nua nda mbia chumunuásaa. Nguerecua je ra mbia jenderao rao tuchi. Ererecua abe je chee ra secheẽ jêsenei senei. ¹⁰Sequiato ra Dios cheẽ turã senei senei ná mbia ja je nyii. Mangué chooñoa jenda ja je. Aquere ra mbae ua ja cote. ¹¹Jemee mose mbia rerecua je, pare pare jenyechĩ nda jê. “¿Manyae ra ũquĩ ñee ndibishorõ nde?” jenyechĩ nda pare pare i jê. Espíritu Turã ae chõ nda jembucheẽ turã nguiã mbia je aque mose. Jê ae ra jeñee eã. Espíritu Turã ae chõ nda jembucheẽ nguiã. ¹²Jenongue ra jemondo chee mbia icuã je. Jêiquia sacuã. Jendu abe ra jemondo chee mbia icuã je. Jendiirĩ abe ra jemondo chee mbia icuã je. Mbia icuã nda jemo iquia iquia chee. ¹³Mbia mangué chooñoa jenda ra jêucuyã tuchi seriĩ. Ae ra siqui bei serese, ũquĩ nda Dios mingo bei.

¹⁴Daniel que embesa Mbae Mbutiãsa İcuã niĩ nda. Mbae Mbutiãsa İcuã nda siqui nguecuáyaã. “Dios rendaque re taico se quiatu”, i ra equia huee. (Ae ra mae nguia sechĩmbesa rese nae, sã ũquĩ eicua.) Jemae mose Mbae Mbutiãsa İcuã ndese, jeña esi. Ae siqui quia Judéaa, sã ũquĩ uchã jei choi ibi ibátee mo. ¹⁵Ae ra siqui tuchia quite rese, sã ũquĩ iqueã nyoi

uchuchua uquiichi mose. Sã echoi chõ uchã hue si bei, umbae rirõ ndocoĩ. ¹⁶Ae ra siqui úcoo, sã ùquĩ nyebiã ngaẽ huiirao rea. Sã hue si bei chõ echoi uchã. ¹⁷Aba mbia eã tuchi ra emo ãquẽ ndiru rerequia mose aque mose. Nguiirĩ mbuquiambu je abe no. ¹⁸“Nyiiseĩ mose eã urechã” jenyeye Dios je. ¹⁹Mbia ra mbae rasi saã tuchi aque mose. Mbae rasi que mbia saã eã jiri nyii ra. Aque ramo mose ra mbae rasi raã tuchi cote. Mbae ua bei sacua ño ùquĩ nde. ²⁰Ae rasi ra mbia saã tuchi nae, ùquĩ nda Dios mbujua jiri uquiato riĩ. Ñ nda emo ñimbirãcuã eã tuchi rei ùquĩ ndasi je. ²¹“A Cristo riqui a jẽ” i mose emo jẽje, “nyia” jenyechĩ nda ùquĩ ñee mose jẽ. “Hue Cristo riqui hue jẽ” i mose emo jẽje, “nyia” jenyechĩ nda eno jẽ. ²²“Cristo chõ se re” ichõiño nda mbia ñee ata atate jẽje. “Dios cheẽ mbuchecua chõ se re” ichõiño nda mbia ñee ata atate jẽje no. Mbia mae sayã nda esaã saã tuchi mbia mbiirĩ irĩ sacua. Ùquĩ Dios quiato abe chee mbiirĩ irĩ arõte. ²³Ùquĩ nonde chõ aico nguiã jembiirandu randu co.

Dios riirĩ nda tube ibate si

²⁴Mbia ùquĩ ndasi raã ja mose ra tenda checuayã mbei cote. Nyasi abe no. ²⁵Nyasitata ra ngoi ngoi. Ibei jenda abe ra quiata quiata chee cote no. ²⁶Aque mose ra achu ibei rese. Senininya tuchi ra sechu mose. Sequirãcuã tuchi ra sechu mose no. ²⁷Angeles serimba ra amondo mbia sechiisirõ munua nua sacua. Ishonda ja. Mangue chooñoa jenda ja. Mbia sechiisirõ nda emunua nua ja seje cote.

²⁸Sã higuera riqui no. Sã ira mo ndiqui no. Ero quira usẽ ja mose, “iraro itõ ndacu ra cote”, i chõ mbia nguiã aque mose. ²⁹Eĩ sí ra mbae ua ja nonde. Ae riĩ aico ñee jẽje nae, ùquĩ ndese jemae mose, “mbae ra ua ja cote” jenyeye ra cote. ³⁰Tacheẽ nyecua jẽje. Ñ mbia riqui ngata ibi ã nae, ùquĩ emo emo nda manoa mbae ua ja nonde. ³¹Ibei ra ua. Ibi abe ra ua no. Secheẽ nguiã ra ua eã mbei.

³²Manosete chõ nda mbae ua ja. Aico eicuayãte co. Mbia mo abe eicuayãte quia ã no. Angeles abe eicuayãte quia ã no. Paba miĩ ño eicua nguiã co. ³³Nyebe jẽingo quiatu quia eraarõ arõ mbei. Jẽtesa tesa bei quia. Ma nyaashĩ ño nda equeru. Jẽicuayãte equia ã. ³⁴Sã ererecua mo oso isho itõte no. Sã ñee ngũimba je oso nonde no. —Sembae jẽsaarõ ja. Ñ ndese jẽingo. Co rese eico nde. Qui rese eico nde no, i que ñee ngũimba miĩ miĩ je ra. —Etesa tesa bei quia, i que eiquesa raarõsa je ra. ³⁵Manosete chõ nda tuchuacha ru. Jẽicuayãte equia ã. Itondaru ramo mose eru arondete. Itondii mose eru arondete. Nguiã cheẽ mose eru arondete no. Eresaitõ ndabe mose eru arondete no. Nyebe jẽtesa tesa bei quiatu quia. ³⁶Jengue mose ra eruchĩ jembuate jẽ. ³⁷“Jẽtesa tesa bei quia” ae chõ nguiã mbia ja je co. Jẽ miĩ je eã, i que Jesús ra.

Jesús nandehi tarõ, i ja ererecua nyue

14 ¹Sacerdote rerecua que ñee ja nyue ra. Embesasa abe no. —¿Mañi nande ra equia Jesús isi nonde re? Eiquia sacua. ¿Mañi

nande ra embiirĩ irĩ nde? i que equia ñee ñee nyue ra. Achite que fiesta de la pascua ñi tu ee cote ra. Dos días. ²—Fiesta mose eã nandeisi jẽ. Mbia ra paama ichĩ nande je jẽ, i que u ñee ñee nyue ra.

Cuña mo aba mbusimbusa turã ichusẽ Jesús aqũ ndese

³Jesús que siqui Simón Leproso chuchúaa ra. Betania, i que hue je ra. Cuña mo ngue tu erea huee ra. Aba mbusimbusa mo ngue equeru ee ra. Sita ao ji ye que ereru ra. Embisẽ tuchi que equeru ra. Mbae isiquia mumbasa tuchi que ũquĩ nda. Eriru churui que esiquio eichusẽ nonde Jesús aqũ ndese equiaru mose ra. ⁴Mbia que chi ja mae erese ra. Paama i que cuña je ra. —¿Mbaerã eichusẽ ñoño nde? ⁵Mbae isiquia ribishorõ ño nda aba emondo re. Mbaecha reã je emee mee sacua, i que ñee icua icua cuña je ra. ⁶Jesús que ñee cote ra. —¿Mbaerã jẽingo ñee ũquĩ nde? Sã cuña ae riqui ae. Ae esaã seje nae, eturãte seje ũquĩ. ⁷Mbaecha reã nguia ra chi arete íbii a. Jẽ mbae raãse mose ee, mbae jesaã turã mbei ee ae. Se quia nda aico bei eã nguia jendese aa. ⁸Seati nonde chõ ngue cuña aba mbusimbusa ichusẽ ja nguia serese. ⁹Tacheẽ nyecua jẽje. Mbia Dios cheẽ turã nenei nenei mose mbia ja je, cuña nyisaã abe ra esenei senei mangue chooñoa jenda ja je. Mbia ndua turã ja sacua echisaã abe rese, i que Jesús ñee mbia je ra.

Jesús tamee jẽje, i Judas mbia icua je

¹⁰Judas Iscariote, i rei que Jesús chimbaaquiato mo je ra. Aque que oso ñee sacerdote rerecua je ra. Jesús mee nonde ee. ¹¹Sacerdote rerecua ia ja que ũquĩ andu ra. —Mbae isiquia uremee tuchi ndeje jẽ, i que ee ra. Nyebe Judas riqui nguia ndua ndua. —Mbia eãsa quiato Jesús tamee ee, i.

Jesús quiaru uchimbaaquiato rese

¹²Fiesta que tu cote ra. Aque fiesta mose bei que mbia riqui oveja iquia iquia querabe ra. Mbichae mbuchimatã iriã ngue eu eu quia aque mose querabe no nda. —¿Mangue ra oveja urembuchi mangue ndechiurã nde? i que echimbaaquiato ñee Jesús je ra. ¹³Ñee ngue uchimbaaquiato nyeremo je ra. —Jëso sucha cuasu. Huee ra jemae emo i rerao rese. I ra equerao quia irasa mo ye. Aque rui jëso. ¹⁴Eique mose, aque tuchuacha je jeñee. “Jesús que urembu ñee sacua ndeje ra. ‘¿Ma cuarto ra urecu quiaru oveja u que re? Sechimbaaquiato rese’, i que Jesús ñee ndeje ra”, jentye tuchuacha je. ¹⁵Tuchuacha ra cuarto cuasu mee jẽje. Mbia quesa ibatenda ra emee jẽje. Embuquiche ji. Huee chõ oveja jembuchi nandequiaru sacua, i que Jesús ñee ee ra. ¹⁶Nyebe echimbaaquiato nyoĩ nguia sucha cuasu. Jesús cheẽ ndui si tuchi que mbae chi ja ee huee ra. Huee que oveja mbuchi huee cote ra.

¹⁷Itondaru ramo mose que Jesús ru uchimbaa quiato ataque rese ra. ¹⁸Quiaru mose que Jesús ñee ee cote ra. —Tacheẽ nyecua jẽje. A

jëingo quiaru serese a nae, jemo nda semondo mbia icuã je, i que ñee uchimbaaquiatsu je ra. ¹⁹Echimbaaquiatsu ia eã tuchi que echeẽ mose ra. —¿Se ra aremondo ee re? i ja jate que ñee Jesús je ra. ²⁰Jesús que ñee ee ra. —Doce jëingo quiaru serese a nae, jemo ño ñene. Ae chĩ quiaru serese aque plato ye sí a nae, aque chõ ñene. ²¹Dios cheẽ ndui sí tuchi ra amano ndaque. Ae ra semee mbia icuã je, aque ra mbae rasi saã tuchi quia. Aba mbia eã tuchi ra aque. “Taĩ sembuchecua jirichĩ nguia curi”, i chee ra aque, i que Jesús ra.

²²Quiaru que u ra. Jesús que mbichae sirõ nda. Gracias i que Dios je ra. Siquio que mbuchao chao ee cote ra. —Ã mbichae jëu. Serete chõ ã nde, i que Jesús ñee ee ra. ²³Vino mbeisa que esirõ cote no nda. Gracias i que Dios je ra. Mondo que uchimbaaquiatsu oo cote ra. Mbei mbei ja que cote ra. ²⁴Jesús que ñee ee ra. —Seruqui chõ ã nde. Mbia icuã mbutiã sacua ño seruqui re. Dios cheẽ yasu rui si chõ seruqui riqui nguia mbia icuã mbutiã ã. ²⁵Tacheẽ nyecua jëje. Vino mo nda ambei eã mbei cote. Paba mbia rerecua tuchi mose, aque mose ramo nguia nda ambei nguia cote, i que Jesús ñee nda.

Jesús aicuayãte resẽ, ichõño nda Pedro seriĩ, i Jesús

²⁶Fraseri rasei que cote ra. Nyoĩ que ibi ibate mo cote ra. Monte de los Olivos, i que hue ibi je ra. ²⁷Jesús que ñee uchimbaaquiatsu je huee ra. —Jëireite ra eriqui seriĩ. Jeñimboseĩ mboseĩ nda oso serecha. Sã embesa ji riqui ñee no: “Mbia ra oveja raarõsa iquia. Ovejas ra ñimboseĩ nyoĩ cote”, sã embesa ji riqui i no. ²⁸Seraaque quera sire ra aso se rane jendaarõ Galilea, i que Jesús ee ra. ²⁹Pedro que ñee ee ra. —Seataque ra ireĩ ireĩte raque ndesi. Se quia ra aireĩ ireiã mbei ndesi, i rei que Pedro ñee ee ra. ³⁰Jesús que ñee ee ra. —Tacheẽ nyecua ndeje. Nguira cheẽ nyeremo nonde ra erecheẽ ñoñoño tres veces seriĩ namo, Pedro. “Jesús aicuayãte resẽ”, ere choñoño ño nda seriĩ, i que Jesús ñee ee ra. ³¹Pedro que ñee ee ra. —Mbia ra seiquia arõte raque nderiĩ, acheẽ ñoñoño eã nda se nderiĩ, i rei que Pedro ra. Eĩ ja que ñee nda.

Jesús ñee ngu je

³²Jesús que oso Getsemaní cote ra. Uchi mbaaquiatsu rese. —Jengoi rã u aa. Tacheẽ na oso Paba je pe jiri se, i que Jesús ee ra. ³³Pe quiti jiri que Pedro rerao ra. Jacobo rese. Juan abe no. Eya eã ndasi tuchi que tu ee aque mose ra. ³⁴Ñee ngue ùquĩ je ra. —Seya eã ndasi tuchi aico co. Seya eã ndasi ra seiquia chee. Jenguchõ na jë aa. Jëtesa tesa bei u aa, i que Jesús ñee ee ra. ³⁵Jesús que oso pe quiti jiri cote ra. Nyibi que u ngoi ngüfã ndese ñee Dios je ra. —Mbae rasi asaã sereãte, i rei que ñee Dios je ra. ³⁶—Paba, mbae eresaã ja arõte nde. ùquĩ ndasi asaã sereãte raque quia co. Ae sebi riqui nae, ùquĩ ndese semingo eã. Ae ndebite riqui

nae, ũquĩ ndese quiatu semingo, i que Jesús ñee Dios je ra. ³⁷Nyebi que u uchĩmbaaquiatsu je cote ra. I que eu uque ja ee cote ra. Ñee ngue Pedro je ra. —Simón, ¿ereque huĩ a re? Ereico areã ñochĩ tesa tesa s e ñee mose Dios je. ³⁸Jētesa tesa u. Jengue eã u ñee Dios je. Mbae icuã tã i eã sacuã jēje. Jēingo serete raque serese. Mbae icuã nguiatu jembuti mbutite nguiã, i que Jesús ee ra. ³⁹Nyebi si que oso ñee Dios je ra. Hue rĩ si que ñee ee ra. ⁴⁰Nyebi que u uchĩmbaaquiatsu je cote ra. I sí que u uque ee no nda. Eresa quiatu ngue eshiu shiute nguiã. —¿Mañi nda aba ñee nde? i ja tuchi que echĩmbaaquiatsu ra. ⁴¹Oso que ñee Dios je pe jiri cote ra. Tres veces que aque cote ra. Uba rei que u ñee uchĩmbaaquiatsu je ra. —Jengue tuchi cote. Jenguenea jēucua cote. Semondo ra mbia icuã je cote. Seiquia sacuã. ⁴²Jēhuã cote. Nyao cote. Ae ra semee mbia icuã je, co eru quia semee sacuã co cote, i que Jesús uchĩmbaaquiatsu je ra.

Mbia icuã Jesús isi suruchoi

⁴³Jesús cheẽ mosebe tuchi que Judas ru era ra. Jesús chĩmbaaquiatsu rei que ae ra. Aque rese que mbia cuaẽ tuchi quia ra. Tiquise abe que ecurucuaẽ nguiã ra. Ira jua abe no. Sacerdote rerecua chõ ũquĩ mbucuaẽ nguiã reaẽ. Embesasa abe. Amei abe. ⁴⁴Judas ñee nyecuayã nguiatu quia ũquĩ je nyii reaẽ. —Ae ritii ra asiite nae, aque chõ ñene. Aque jēisi quiatu tuchi serao, i quia equia ee nyii reaẽ. ⁴⁵Jesús riichã ngue esi saludar i ee cote ra. Jesús ritii que esiite ee cote ra. ⁴⁶Mbia que Jesús isi cuaẽ ecua cote ra. ⁴⁷Ūquĩ mose que Jesús rimba mo uchuuru sirõ tiquise ra. Sacerdote rerecua rimba rese que tiquise uru ra. Eisa que echisia ra. ⁴⁸Jesús que ñee mbia ja je cote ra. —¿Mbaerã jenyu quia tiquise rurucuaẽ serea co re? Ira jua abe no. Mbae mbuquiachãsa rea rocoĩ jenyuchĩ nguiã serea co. ⁴⁹Tenda que amumba mumba beite rei quia jendese Dios chuchua resẽ. Mbia que ambaaquiatsu quiatu bei rei quia huee resẽ. ¿Mbaerã seisiã nyucua aque mose re? Embesa ji ique sacuã ño jēicuã icuã ndiqui nguiã seje ã, i que Jesús ñee ee ra. ⁵⁰Echĩmbaaquiatsu que nyoi ja chee uchã Jesús recha ra. ⁵¹Acuanĩndu miĩ mo ngue oso erui ra. Tiru miĩ ngue equereco nyiati ra. Mbia que acuanĩndu abe isi rei ra. ⁵²Huiĩrao que esecha oso uchã nda. Eirao eã tuchi que oso uchã nda.

Jesús mbia curuchoi mbia rerecua je

⁵³Mbia que Jesús curuchoi sacerdote rerecua je cote ra. Huee que sacerdote rerecua ja chĩ ñumunua nda. Embesasa abe. Amei ererecua ja abe no. ⁵⁴Pedro que embuchurucha rucha oso quia erui ra. Ngasẽ nyee que sacerdote rerecua itaicuee ra. Hue que ngoi sacerdote rimba mo ndese ra. Nyee que huĩ huee ra. ⁵⁵Sacerdote rerecua que chĩ ja huee ra. Amei mbia rerecua ja abe no. Mbia rerecua ja tuchi. —Jesús nandeiquia, i rei que ñee ñee nyue ra. —¿Mbae i ra aba mbia je Jesús riicharã nde? i rei que u

ñee ñee nyue ra. ⁵⁶Emo emo ngue ñee icuã icuã ndei Jesús riñ nda. Ucheẽ ngue etasa tasa tuchi chõ nda. ⁵⁷Mbia mo abe que juã ñee ñooño eriñ nda. ⁵⁸—Jesús cheẽ ngue urechandu ra. Ñee icuãte que Dios chuchua riñ nda. “Dios chuchua tambocoï mbia chiao. Tres días mose ra Dios chucharã asaã no. Mbia chiao eã nda ñquĩ cote”, i que urechandu Jesús cheẽ nda, i que ñquĩ ñee ñooño Jesús riñ nda. ⁵⁹Ucheẽ ngue etasa tasa bei chõ nda. ⁶⁰Sacerdote rerecua que juã ñee Jesús je ra. —¿Echeẽ nda eresibishorõ eã mbei re? ¿Mbae i equia nderiñ nde? i que ñee Jesús je ra. ⁶¹Jesús que ñee eã mbei echeẽ mose ra. Sacerdote rerecua que ñeembe ee ra. —¿Dios rucucha nde re? ¿Cristo nde re? i que ñee Jesús je ra. ⁶²Jesús que ñee ee ra. —Ae. Dios rucucha chõ se re. Jemae nda serese s e coi mose Dios quirãcuã jii. Sechu mose abe ibeishĩ ndese, i que Jesús ee ra. ⁶³⁻⁶⁴Sacerdote rerecua que paama i tuchi Jesús cheẽ mose ra. Huiirao que endoro ndoro chee ra. Ñee ngue ererecua ataque je ra. —Jesús riqui Dios rucucha raã naa co. Jeñandu jate equia ã. Sã mbia mo nandembiirandube eã cote. Nandemae ndei ngue erese re. ¿I jëje re? ¿Mañi nande ra equia re? i que sacerdote rerecua ñee mbia rerecua ataque je ra. —Eicuã tuchi que ra jë. Sã mbia eiquia, i jate que ererecua ñee Jesús riñ nda. ⁶⁵Mbia que ñinimbu nimbu Jesús ruba rese cote ra. Eresa que echati mbae mo je ra. Ucuu ucuu tuchi que erese cote ra. —¿Aba ucuu ucuu u nderese a re? Eicu no, i que equia eresa ati ji je ra. Soldados abe que ucuu ucuu tuchi eresa rese ra.

Jesús aicuayãte resẽ, ichõiño Pedro

⁶⁶Pedro que chĩmbeite ngoi itaicuee ra. Nyucuaaque mo ngue tu huee sacerdote rerecua rimba ra. ⁶⁷Pedro que chĩ nyee tata jii ee huee ra. —Jesús resenda que nde abe ra, i que nyucuaaque ñee mae mose Pedro rese ra. ⁶⁸—Tei. Ndecheẽ aicuayãte, ichõiño ngue Pedro ñee ee ra. Hue si que esi eiquesa quiti cote ra. Usẽ mose que nguira ñee cote ra. ⁶⁹Nyucuaaque que maembe erese ra. —Co abe que Jesús resenda ra, i que mbia ataque je ra. ⁷⁰—Tei. Aicuayãte se, ichõiño ngue Pedro ee no nda. Ae chi huee nae, ñquĩ mo ngue ñee ee cote ra. —Jesús resenda chõ nde abe resẽ. Galilea jenda chõ nde resẽ, i que ñee Pedro je ra. ⁷¹Pedro que jurar i tuchi ñee ee ra. —Aicuayã tuchite se resẽ, i que ñee ñooño si no nda. ⁷²Aque mose tuchi que nguira ñee sí cote ra. Pedro que ndua Jesús cheẽ ndese cote ra. Sã Jesús ñee ee nyii no. —Nguira cheẽ nyeremo nonde ra erecheẽ ñooño tres veces seriñ, sã Jesús i ee nyii no. Ñquĩ ndese que Pedro ndua cote ra. Nyebe nyeseo tuchi nguia cote.

Mbia Jesús curuchoi Pilato je

15 ¹Nyaashĩ namo mose que sacerdote rerecua ñmunua ja ra. Amei ererecua abe no. Embesasa abe no. Mbia rerecua jate que ñmunua nda. Jesús que echucua suruchoi Pilato je ra. Pilato rei mbia rerecua hue jenda ja. ²—¿Judíos rerecua chõ nde re? i que Pilato ñee ee

ra. —Ae. Judios rerecua chõ se re, i que Jesús ee ra. ³Sacerdote rerecua que ñee ñoño tuchi Jesús rĩi nda. Ñee icuã tuchi que eriĩ nda. ⁴—Sã ñee icuã icuãte nderiĩ jẽ. ¿Echeẽ nda eresibishorõ eã nde? i que Pilato ñee Jesús je ra. ⁵Jesús que ñee ãte echeẽ mose ra. Nyebe Pilato nyuruirra tuchi nguiã echeẽ eã mose.

Jesús jêiquia mbucha ira rese, i ererecua

⁶Pilato que mbia tarõ ji mo mbusẽ mbei quia pascua mose ra. Co mii ngue embusẽ mbusẽ mbei quia pascua mose ra. Ae je mbia riqui ñee, “aque embusẽ mondo” i nae, aque chõ ngue embusẽ mbei quia ee ra. ⁷Barrabás, i que etarõ ji mo je ra. Emo abe que chi huee erese ra. Mbia iquiasa que ùquĩ nda. ⁸Mbia que ñee ngaẽ Pilato je ra. —Mbia mii tarõ ji que erembusẽ mbeite quia, einyere si emo mbusẽ namo, i ja que mbia ñee Pilato je ra. ⁹—¿Judío rerecua ra ambushẽ mondo jêje Jesús re? i rei que Pilato ra. ¹⁰—Sacerdote rerecua riqui paama i chooñote Jesús je ã, i quiatu que Pilato ndua ndua uchiangui re ra. ¹¹—Sã Pilato Barrabás mbusẽ mondo Jesús rendaque re, i tuchi que sacerdotes ñee ja mbia je ra. Nyebe que mbia “Barrabás embusẽ mondo” i chee Pilato je ra. ¹²—¿Mañi ae quia ra Jesucristo je re no? i que Pilato ñee ee ra. ¹³—Embucha ira rese, i ja que mbia ñee ee ra. ¹⁴—¿Mbae icuã esaã nde? i que Pilato ñee ee ra. —iEmbucha ira rese jê! i bei bei que mbia ra. ¹⁵—Mbia turã jiri nda seje chã, i chee que Pilato ra. Nyebe Barrabás mbusẽ mondo nguiã. Jesús quiatu que eiruã nua cote ra. —Jembucha iquia ira rese, i que mbia je cote ra.

¹⁶Soldados que Jesús cuasa curuchoi ererecua chuchúaa ra. Huee que soldados ataque abe ngaẽ ja Jesús mama no nda. ¹⁷Tiru ireĩ ngue emingue ee cote ra. —Ererecua chõ nde re, ichõiño iquia iquia ee. Nyu ritimeĩ uma ji que emii eãquĩ ndese corona nda. ¹⁸—Judío rerecua tuchi chõ nde re, ichõiño ngue iquia iquia ee ra. ¹⁹Ira que euru uru eãquĩ ndese ra. Ninimbu nimbu abe que erese no nda. Ngoi ngoi que ngũfã ndese erimba raã naa ee ra. ²⁰I quia iquia tuchi que eu ee ra. Aquere que tiru ireĩ mbui esi cote ra. Eiraote que emingue ee cote ra. Curuchoi que embucha nonde ira rese cote ra.

Mbia Jesús mbucha ira rese

²¹I rei que emo u quia uco si ra. Simón, i que ee ra. Cirene jenda mo ngue ae ra. Alejandro ru que ra. Rufo ru abe no. Aque que soldados isi ira mbuchicuandasa ji rerao sacua ee ra. Cruz, i equia ee. Nguerao que cote ra. ²²Ngasẽ ngue pee cote ra. Gólgota, i que hue je ra. Eresa cuare, i chõ nguiã hue je. ²³Huee que vino mondo rei Jesús je ra. Mirra je emubarai. Mbei eã ngue ra. ²⁴Soldados que Jesús mbucha ira rese ra. Aquere que sita ñetẽ mbaba mbaba o je cote ra. —Aba ra Jesús irao querao ñi ja, i

que nyue ra. ²⁵Tenda chui ite ramo mose que embucha ira rese ra. ²⁶Mbia que letrero mii Jesús ãquĩ nguĩti ibate ra. JESUS REI JUDIO RERECUA i que embesa mii nda. Ûquĩ nii ño eriqui nguĩã eiquia hue. ²⁷Mbia nyeremo abe que embucha ira rese Jesús chabe ra. Jesús rereco chobei que emii ira rese ra. Mbae mbuquiachãsa tuchi que ùquĩ nda. ²⁸Embesa ji cheẽ nguire que Jesús iquia mbia icuã ndese cote ra. Sã embesa ji riqui ñee no: “Mbia icuã ndese ra eiquia, sã embesa ji i ñee nyii no. ²⁹Mbia que iquia iquia quia Jesús cheẽ naa naa ecuã mose ra. Ñee icuã icuã ee. —“Dios chuchua ra ambucoi. Tres días mose ra ambuchuruambe” ere que equia. ³⁰Equiche u nde ae hue si no, i tuchi que mbia quia iquia iquia ee ecuã mose ra. ³¹Sacerdote rerecua abe que iquia iquia chõ nguia ee ra. Embesasa abe no. Ûquĩ ngue ñee icuã icuã ja quia eriĩ nda. —Mbia que embuquera quera rei nyii ra. Ae sí quera aroneate nguĩã aque. ³²Judío rerecua mose ae, sã ae ae nguichi ira si. Cristo mose ae, sã ae ae nguichi no. Ì nda uremae erese. Ì nda ureicua cote, i ja que ererecua ñee icuã icuã eriĩ nda.

Jesús mano mose cote

³³Tenda nandeite re mose que itondaru tu ra. Itondaru bei que mbia ja je tres horas ra. ³⁴Tenda cheseco mose que Jesús ñeemombo cote ra. —Eloi, Eloi, ¿lama sabactani? i que ñee mombo ra. —Dios sererecua, ¿mbaerã ereico hui sesi re? i chõ ngue ñee nguĩã. ³⁵—Elías je eriqui “quiatuchu” i reae, i rei que echeẽ andusa mo nda. ³⁶Emo ngue esponja monde vinagre ye ra. Ira ai rese que embia ji mondo rei Jesús chúruu cote ra. —Esecha rei. Sã Elías ruãt e quia erea, i que emo ñee ee ra. ³⁷Jesús que tasẽ mano mbei cote ra. ³⁸Aque mosechi tuchi que cortina nyisia Dios chuchua jenda ra. Ibate si que eru nyisia íbii ra. ³⁹Soldado rerecua que chĩ Jesús nonde mae erese ra. Emano ndese que eñi mae nda. —Dios riirĩ ño eriqui re, i que cote ra.

⁴⁰Cuña ngue chi jate ma e Jesús rese isho ra. María Magdalena abe que chĩ huee ra. Salomé abe no. María abe no. María rei José si. Jacobo Ñetẽ si abe no. ⁴¹Ûquĩ ngu e siqui bei quia Jesús rui ra. Echiurã ngue emii mii mbei quia ee ra. Galiléaa eico mose bei. Cuña tubiriãte abe que chi mae Jesús mbuchai rese huee ra. Ae nyoĩ Jesús rese Jerusalén, ùquĩ.

Mbia Jesús raaque chati cote

⁴²Tenda que oso cote ra. Sábado nonde. Aque mose bei que mbia riqui mbae mbuquiche ja sábado sacuã nda. ⁴³Aque eresaitõ mose que José si ñee Pilato je ra. Judío turã ngue ae ra. Arimatea jenda que ae ra. Judío rerecua que ae no nda. —Dios ra ererecua, i beite que equia eraarõ arõ nda. Aque que ireĩ ireĩ ãte oso ñee Pilato je ra. —Jesús raaque emee na seje, i que oso ñee ee ra. ⁴⁴—¿Mano jei tuchi ere? i tuchi que

Pilato uchiangui re ra. —Quiatuchu rã sembiirandu. ¿Jesús mano cote re? i que Pilato ñee soldado rerecua je ra. ⁴⁵—Mano ngue cote ra, i que soldado rerecua ñee ee ra. Nyebe Pilato eraaque mondongiã José je cote. ⁴⁶José que Jesús raaque mbuquichi cote ra. Tirushī turã mo ngue eisi ra. Eraaque que echuma aque je cote ra. Iti que echoi sita ribicoi ji imi ye ra. Nyati que sita cuasu mo je cote ra. ⁴⁷María Magdalena ngu e mae mi eati rese ra. María rese. José si que ae ra.

Jesús raaque quera si

16 ¹Jesús raaque ati ji que chibe sábadó mose ra. I nyaashī oso quia domingo mose, aque mose que cuña mo nyoí mae eatisa rese ra. María Magdalena. Salomé abe no. María abe no. Jacobo si rei ae. Ũquĩ ja que aba mbushimbusa isi rei eichusē chusē sacuã Jesús raaque rese ra. ²Tenda nyui ramo mose que echoi eatísaa ra. ³—¿Aba ra sita curuba nande je eatiquia re? i rei que echoi quia ñee ñee nyue ra. ⁴¿ que sita rurubai u ee cote ra. Sita cuasute quiatu ngue re. ⁵¿que rei que echoi sita imi ye ra. Acuanindu mo ngue chī ngoi huee equiatocuti quiti ra. Huiiraoshī oco tuchi que ecunui huee ra. Cuña ngue siquiche tuchi ra. ⁶Acuanindu que ñee ee ra. —¿Mbaerã jëingo siquiche re? Jesús raaque jësequia raque quia ã. Emoate a resē. Eraaque que quera si no. Jemae eatisa rese ae. ⁷Jëso asi rã echimbaaquiatu mbiirandu erese. Pedro abe jembiiirandu. “Jenonde ra esi Galilea. Jemae nda erese huee. Sã ñee jëje nyii no”, jenyee embiiirandu, i que acuanindu ee ra. ⁸Cuña ngue siquichete echeē andu ra. Uchã ngue echoi eatisa si ra. Ñee eã tuchi que mbia mo je ra. Esiquichete quiatu ngue re.

Jesús nyecua María Magdalena je

⁹Jesús que quera si nyaashī namo mose domingo mose ra. María Magdalena nane je que nyecua ra. Aque si chō eriqui siete aba checuayã icuã jea nyii reaē. ¹⁰Ae que oso Jesús quiato mbiirandu ja cote ra. Ngasē mose ee que echi nyeseo jate eya eã ee ra. ¹¹—Jesús que quera si ra. Amae ngue erese ra, i rei que embiiirandu ra. Quera aroneate que ũquĩ je ra.

Jesús nyecua uquiato nyeremo je

¹²Aquere que nyecua uquiato nyeremo je ra. Ishote que sucha tubiriã si ra. Emo na tuchi que ee ra. ¹³—Jesús que quera si nyecua ure je ra, i rei que echoi uataque mbiirandu ra. Quera aroneate que ee no nda.

Jesús uchimbaaquiatu mondo mbia mbiirandu

¹⁴Aquere que Jesús nyecua uchimbaaquiatu ja je no nda. Once je. Ũquĩ quiaru mose que nyecua ee ra. Ñee asi asi que ee ra. —¿Mbaerã jeñia ãtãte riqui re? ¿Mbaerã “nyia” jenyee eã jembiiirandu mose sequera rese re? i que ñee ee ra. ¹⁵—Jëso secheē nenei nenei mbia ja je. Mbia

mangue choñoa jenda ja je. ¹⁶Mbia mo nda seicua icua. Ñquĩ je bautizar jenyẽ. Ñquĩ nda siqui bei cote. Ae ra seicuayã, ñquĩ nda mbae rasi saã mbei. ¹⁷Seicuasa ra mbia mae sayã saã saã tuchi. Aba checuayã icuã nda eja jea mbia si seriĩ. Mbia cheemo nda esaã. ¹⁸Mbei ra eisi isi o je. Aba iquiasa mbei mose ra erasiã. O ra echono ñono erasi arõ embucherõ sacuã, i que Jesús uchimbaaquiatu mondo ra.

Jesús nyui oso ibate

¹⁹Jesús ñee ja mose que Dios equerao ibate cote ra. Siqui bei sacuã Dios jii cote. ²⁰Echimbaaquiatu que nyoi Dios cheẽ nenei nenei mbia ja je ra. Mangue choñoa jenda ja je. Dios que siqui tuchi quia erese ra. Mbia mae sayã tuchi que esaã saã nguia ra. Mbia Dios cheẽ icua sacuã. Amén.